

Ka tisa-ni rigixxi'akana ge Jesús-ni ka nu ben Marcos-ni

Juan benne rugadi indaha rekie rigixxi'e ge Jesús-ni
(Mt. 3:1-12; Lc. 3:1-9,15-17; Jn. 1:19-28)

1 ¹Nii ridulo ka tisa ka nu rigixxi'akana ge Jesucristu benne anka Xi'in Tata Do Yebáha. ²Ukaba atti tteba ra lo yetsi ben profeta Isaías-ni. Lo yetsiha rinne Tata Do Yebáha rulise Jesús-ni, ree:

Neti idhelhaa ttu benne tsie nnerue lolu kini kixxi'e ka tisa kia-ni.

Benneha idhalie neda gelu.^a

³ Lo yu bisi ata lanú benne se'e, niha riyien tsi'i benneha rinnebie idisa, ree:

“Gwalegixxa tse neda ge benne anke Xxanari'iha. Gwalolixxa neda kini dhabie.”^b

⁴Aníha-ba ben Juan benne rugadi indaha tti ugwekie lo yu bisiha, rigixxi'anie ka benne kini odúna ke nna odaxxuke neda ge Tata Do Yebáha, nianna gadike inda kini anáchu nna ixú elha xen lasi ge ka tulha ruinkeha.

⁵Iyába ka benne se'e lhe'esi Jerusalén-ni lhe ka benne se'e itúba daka Judea-ni lhe, risinke ata reki Juan-ni, rigixxi'ake ge ka tulha ruinke nna rugadie ke inda lhe'e yoo Jordán-ni.

⁶Juan-ni itsa xo camellu-ba uka xoe nna udhí lhe'ebie ttu yieti. Nu xixxi ge betsirúba lhe kutsittaba lhe utobie ugwekie ⁷nna rigixxi'anie ka benne, ree ke:

^a 1:2 Malaquías 3:1

^b 1:3 Isaías 40:3



(San Marcos 1:1-8)

—Iki de neti nna si dala attu benne ra tsitsiru lebie attichula neti. Neti labí elha ralhaa iyettaa idhasia lo ka gwaracha geeha. ⁸Gwalí galá neti tti rugadia le inda, suna indaba rixúti, ttaka benneha nna ugadie le Espíritu ge Tata Do Yebáha.

Jesús-ni radie inda

(Mt. 3:13-17; Lc. 3:21-22)

⁹Lhe'e ka sáha-gaba udá Jesús-ni lhe'esi Nazaret, re nuha daka Galilea. Nianna bisine nna begadi Juan-nie inda lhe'e yoo Jordán-ni. ¹⁰Tti lo reria Jesús-ni lhe'e indaha, nianna bilánie biyali yebáha nna Espíritu ge Tata Do Yebáha attiba ttu becha ugwadie betedhoe ikie. ¹¹Nianna tti biyien tsi'i ttu benne unnebie yebáha, ree bie:

—Lu ankalu Xi'inia rakati gelu; lu ankalu benne ru'u lasia.

Nu xxegwiha benna dhi yiena Jesús-ni

(Mt. 4:1-11; Lc. 4:1-13)

¹²Nianna che tteba Espíritu ge Tata Do Yebáha Jesús-ni daka lo yu bisiha, ata lanú benne se'e. ¹³Niha ugwekie chua (40) ubisa ata reki ka nimala ixxi. Niha-gaba ben nu xxegwiha dhi yiene nna ka anjeliha-ba bete náke lenbie.

Jesús-ni uduloe rigixxi'abie ka tisa ge Tata Do Yebáha

(Mt. 4:12-17; Lc. 4:14-15)

¹⁴Iki de chi utixxakana Juan-ni lisiyya, Jesús-ni nna deyye daka Galilea rigixxi'anie ka benne ka tisa tse, delába rigixxi'e gasina ki akake benne innabia Tata Do Yebáha ke. ¹⁵Nianna ree ka benneha:

—Chiba gwa dona sá ga'anani Tata Do Yebáha lhe chigaba dabigana innabie. De nuha nna gwalodúna le nna gwaltsia lele ge ka tisa geeha.

Jesús-ni raxie ttpa ka benne kini udhetinie ke

(Mt. 4:18-22; Lc. 5:1-11)

¹⁶Tti ute Jesús-ni ro'o indatoo ge Galilea-ni, niha bilánie Simón-ni lenna betsini Andrés-ni yu'ukana rudelhakana yexxa ge ka belhaha lhe'e indaha, kumu anakana benne rudaxxu belha. ¹⁷Jesús-ni nna ree kana:

—Gwaltá gwetenalha neti. Neti nna unia kini akale ka nu gaxile ka benne ki udaxxuke neda ge Tata Do Yebáha.

¹⁸Looraha tteba nna bese'e bixxibakana ka yexxa gekaniha nna diakana danalhakane.

¹⁹A lattiruba bededábie nna bedelánie Jacobo-ni lenna betsini Juan-ni. Ka nuha anakana xi'in Zebedeo. Se'ekana lhe'e barcu gekaniha reyoinkana ka yexxa ka nu rudaxxu lenkana belhaha. ²⁰Nianna uxi ttebe kana. Lakana nna bedhá bixxiba ikikani tata gekaniha lo barcuha lenie ka nu ren sina gekaniha, nianna dia ttebakana danalhakana Jesús-ni.

Jesús-ni bebeabie ttu espíritu satsa yu'u lati ttu nubiyú

(Lc. 4:31-37)

²¹Tti bisin Jesús-ni lenie ka benne rudhetinieha lhe'esi Capernaum-ni, la sá tti reyaka le ka benne Israel-ni, uta'a ttebe lhe'e yo'o ata rudhetike ka tisa ge Tata Do Yebáha nna uduloe rule'enie ka benne se'e niha. ²²Ka benneha nna rebanabakanie ge nu rule'enie keha kumu rinnebie ttiba rinne ttu uxtisi rapa lo neda, labí tti rinne ka nu rule'ekinna ka benne nu ra lo bia bennabi bodha'an Moisés-ni. ²³Lhe'e yo'o ata rudhetike ka tisaha, niha re ttu nubiyú yu'u latini ttu espíritu satsa. ²⁴Nubiyúha nna unnena idisa, rana:

—¡Begwelha ri'itu! ¡Bittu etega'a gelu len ri'itu, lu Jesús ge Nazaret! ¿Si dalu gwetse'e loo ri'itu? Neti gwankabiabati lu. ¡Lu ankalu benne chi ulesi Tata Do Yebáha!

²⁵Jesús-ni nna bedhaka dise espíritu satsaha, ree nuha:

—¡Bedhea ro'olu nna beria lati nubiyú-ni!

²⁶Espíritu satsaha nna bekubi xxattana nubiyúha nna ribesi'a layabana beriana latini. ²⁷Iyába ka benne se'e niha bebanabakanie nna rinnaba tisa luesike, ráke:

—¿Bíunni raka? ¡Nubiyú du-ni rula'ana attu tisa kubi!
¡Xxeniba ra leni nna axtaba ka espíritu satsa-na rudokana tisa
ge nu rana!

²⁸Nianna ttu nnelaba ugwadhi tisa ge Jesús-ni nna ka
benne se'e itúba daka Galilea-ni rinneke ge nu runieha.

Jesús-ni beyonie ixé ka benne rani

(Mt. 8:14-17; Lc. 4:38-41)

²⁹Atti beriake lhe'e yo'o ata rudheti ka benne Israel-ni ka
tisa ge Tata Do Yebáha, Jesús-ni lenie Jacobo-ni lhe Juan-ni
lhe dia ttebake lisi Simón-ni lhe Andrés-ni lhe. ³⁰Nan ge
nuila ge Simón-ni teba benneha yu'u xxatte xilhaa. Nianna
utixxi'akinna Jesús-ni ge benneha. ³¹Jesús-ni nna ubiga ttebe
bedaxxue ná benneha nna ulhidhe bie. Looraha tteba nna
beria xilháha lati benneha nna udulo ttebe benie nu utoke.

³²Atti chi ugwadi tatubisa-na lo'eyya-na, tti chi daa ratti
loha, la'ania nna iyába ka benne yu'u isagwe latike lhe ka
benne yu'u latike espíritu xxegwi uchekana ke ata du Jesús-ni.
³³Nianna itúba yiesiha bitupa ro'o yo'o ata dueha. ³⁴Jesús-ni
nna beyonie ixeba ka benne rani yu'u latike iyá looba isagwe
lhe bebebie ixeba ka espíritu xxegwi yu'u lati ka benne lhe.
Labi begwelhe inne ka espírituha kumu yúbakana nú anke.

Jesús-ni rigixxi'abie ka tisa ge Tata Do Yebáha daka Galilea

(Lc. 4:42-44)

³⁵Dila tteba ugwadha Jesús-ni. Sa rula'aruba chulhaha
birie die ro'esiha nna bisine ttu latti ata lanú benne se'e. Niha
ulhapie tisa len Tata Do Yebáha. ³⁶Simón-ni lhe ka benne se'e
lennaha, diake satilake bie. ³⁷Tti gwaxxakake benneha nna
ráke bie:

—Iyába ka benne chi rekike ugila lu.

³⁸Lee nna ree ke:

—Tsiari'i lhe'e adí ka yiesi se'e gaxxaba nii kini lhe'e ka
nuná kixxi'agabaa ka tisa ge Tata Do Yebáha, kumu de nuha-la
daya.

³⁹Itúba Galilea-ni reki Jesús-ni rigixxi'e ka tisa ge Tata Do
Yebáha lhe'e ka yo'o ata rudheti ka benne se'e niha ka tisa
geeha lhe anágaba nna rebeagabe ka espíritu xxegwi yu'u lati
ka benneha lhe.

Jesús-ni beyonie ttu benne raka latie yiesu nu tee láni lepra
(Mt. 8:1-4; Lc. 5:12-16)

40 Ttu benne biyú raka latie yiesu nu tee láni lepra, bisine ata du Jesús-ni nna bedú xibie arlo benneha nna ree bie:

—Tata to, ganna lu aka lelu, gwadaabalu eyoinlu neti.

41 Jesús-ni nna gwtuaba lebie benneha nna tti belhí nábíe utane lati benneha nna ree bie:

—Gwaka galá lasia. ¡Nnanna, chinka beyaka!

42 Looraha tteba nna betúa yiesuha lati benneha nna beyaka ttebe. **43** Nianna bedhelha tteba Jesús-nie deyye nna bodha'an tsisie, ree benneha:

44 —Biyú gelu. Anuttu nu kixxi'enlu. Sun tteba nna ugía gwatso du arlo bixxudiha nna uche úna nu daa lolu utelu ge Tata Do Yebáha de chi beyarilu. Beni attiba ra lo bia bennabi bodha'an Moisés-ni. Aníha kini uyú lo ka benne deki chiba betúa isagwe-na latilu.

45 Ttaka benne biyúha nna adíla benie. Tti berie niha deyye nna iyába ka benne utixxi'anie ge nu chi ben Jesús-ni. De nuha nna birua uka ga'a Jesús-ni la saa lhe'e ka yiesi se'e niha. Ka ro'esiha-liba ridúe ata lanú benne se'e. Ata dueliba risina ka benne daa lhe'e iyába ka yiesiha.

Jesús-ni beyonie ttu benne daa yatti latie
(Mt. 9:1-8; Lc. 5:17-26)

2 ¹Iki de chi ute ttu chupa ubisaha nna bedesin Jesús-ni lhe'esi Capernaum-ni attu libe. Sun tteba bina ka benne deki chi doe lhe'e yo'oha, ²nianna bitupa tteba ixeruke. Laxkala axtaba ro'o puertaha birua rakanike. Jesús-ni nna rigixxi'anie ke ka tisa ge Tata Do Yebáha. ³Nianna tti bisin ttapa ka benne biyú nujake ttu benne daa yatti latie ata dueha. ⁴Ttaka kumu de tupa xxatta galá benne ro'o yo'oha, laxkala bi uka ga'ake len benne raniha kini isinke ata du Jesús-ni. Nianna tti ugwapike iki yo'oha nna utuake ttu chupa ka texa ki udo belea ttu lhixxaba ata dueha. Aníha-ruba kini uka ulhidake benne raniha xue lo ttu breta. ⁵Tti bilani Jesús-ni gwa riaba le ka benneha deki gwadaabe eyonie benne daa yatti latieha, nianna tti ree benneha:

—Xi'ini to kia, nnanna chiba bixú elha xen lasi ge ka tulha gelu-na.



(San Marcus 2:1-12)

⁶Niha-gaba se'e ttu chupa ka nu rule'ekinna ka benne nu ra lo bia bennabi bodha'an Moisés-ni. Ka nuha nna belaba lhi'u lekani, rakakinna: ⁷“¿Beaka rinne nu du-ni aní? Rilhida gaabana Tata Do Yebáha tti rinnena aná. Lanú nu aka geni dhina elha xen lasi ge ka tulha ruin ka benne, sunruba Tata Do Yebáha gwaka gebie dhie elha xen lasi gekani.”

⁸Ttaka Jesús-ni nna ute da ttebanie deki rulaba lhi'u lekani aníha. Nianna tti unnaba tise kana, ree:

—Lebi'i nna, ¿beaka rulaba lhi'u lele aná? ⁹Gwalinnáruga, ¿bí nuha nu sattiru gari'i benne daa yatti latie-ni? ¿Si gari'e: “Chiba bixú elha xen lasi ge ka tulha gelu-na” ak? o ¿gari'e: “Beyadha nna bodaxxu nu xualu loin-na nna bedá”?

¹⁰Nnannaruga ula'ania le ki uyú lole deki neti benne daya yebáha, yiesi lo yu-ni gwa teeba lo neda kia ki dhia elha xen lasi ge ka tulha ruin ka benne.

Nianna tti ra Jesús-ni benne daa yatti latieha:

¹¹—Lu rulisaa. Beyadha nna bodaxxu nu xualu loin-na nna beyya lisilu.

¹²Benne daa yatti latieha nna beyadha ttebe nna bodaxxue breta xue loniha nna berie lo iyába ka nu se'e niha. Ka nuha nna iyábakana bebanakinna, rákana:

—¡Xxeniba ra le Tata Do Yebáha! ¡Niru tsa labí chi bilenri'i aka luesi nu uka-ni!

Jesús-ni raxie Leví-ni kini sanalhane

(Mt. 9:9-13; Lc. 5:27-32)

¹³Iki de nuha nna bederia Jesús-ni dedheywe ro'o indatooaha nna iyába ka benne risinke ata dueha. Labie nna rule'enie ke ka tisa ge Tata Do Yebáha. ¹⁴Tti utebie die, nianna bilánie Leví^c xi'in biyú Alfeo-ni dona ata rukixakana belhiu nu daa lo ka benne rigixake ge Roma. Nianna tti ree na:

—Utá betenalha neti.

Nianna udú lii ttebana nna gwanalhane.

¹⁵Uka nuha, tti chi do Jesús-ni go yetta lhe'e lisi Leví-ni, ixeba ka gwexixa lhe adíru ka nu tekinna lákani deki anakakana ka nu ruin satsa se'egabakana lenie go yetta. Anágaba nna se'egaba ka benne rudhetinieha. Kumu ixeba chi raka ka benne danalhake bieha. ¹⁶Ka nu rule'ekinna ka benne nu ra lo bia bennabi bodha'an Moisés-ni, delába ka nu anakakana fariseo, tti bilákinna dobie go yetta len ka gwexixaha lhe ka nu ruin satsaha lhe, nianna tti rákana ka benne rudhetinieha:

—¿Beakala maestru gele-na nna robe yetta len ka gwexixa-na lhe len ka nu ruin satsa-na lhe?

¹⁷Tti biyienin Jesús-ni nu rákanaha, nianna tti ree kana:

—Ka nu abittu rani-na, ka nuná labí riyasakin nuná nu eyoinna kana, sinuki ka nu rani-nala nuná riyasakinna nu eyoinna kana. Neti laa dagaa raxia ka nu ruin nu dika ixú, sinuki dalaa kini raxia ka nu ruin satsa.

Jesús-ni rigixxi'abie nuka utte ubina lhe'e ka benne

(Mt. 9:14-17; Lc. 5:33-39)

¹⁸Atti bilani ka benne deki ka nu rudhetini Juan benne rugadi indaha lhe ka nu rudhetini ka fariseo-ni lhe, ka nuha rutteba ubina lhe'ekani, labí rokana yetta, nianna tti ugía ka benneha nna gweasike Jesús-ni:

—¿Beakala ka nu rudhetini Juan-ni lhe ka nu rudhetini ka fariseo-ni lhe rutteba ubina lhe'e ka nuná, ka nu rudhetinlu-na nna labí rutte ubina lhe'e ka nuná?

^c 2:14 Leví anka attu lá Mateo.

19 Nianna bekabi Jesús-ni, ree kana:

—¿Laaba ganna labí dika utte ubina lhe'e ka benne biyaxi kini tse'eke dha'aha, laka sa du nu kwiti rutsá náníha lenke? Neti ria: laka sa du nu kwitiha lenke labí dika utte ubina lhe'eke. **20** Ttaka ganna chi bisia sá tti itua nu kwitiha, anúruna dho lenke, la'anialigaba nna chi utte ubina lhe'eke.

21 'Anágaba lanú ttu benne do rotábie ttu ro'o lari kubi ro'o xo yaxxu geeha. Kumu ganna aníha unie, la'ania nna iyalhiba ro'o lari yaxxuha, nianna adíla satsa ireda xoeha, **22** lhe nigaba lanú ttu benne do riga'abie vinu kubi lhe'e ka yieti yaxxu. Kumu ganna aníha unie, vinu kubiha, ganna chi úlana, la'ania nna itsúba nuha yietiha nna ilaliba vinuha lhe tse'e loogaba yietiha lhe. Laxkala vinu kubiha teeki ita'a nuha lhe'e ka yieti kubi.

Jesús-ni anke xxana ka sá reyaka leri'i

(Mt. 12:1-8; Lc. 6:1-5)

23 La sá tti reyaka le ka benne Israel-ni, la'ania ute Jesús-ni lhe'e ka xuxtila se'e niha len ka benne rudhethinieha. Ka benneha nna uduloke richekuke iki ka xuxtilaha. **24** Ka fariseo-ni nna rákane:

—¡Biyúruqa! ¿Beaka ruin ka nu rudhethinlu-na nu abittu ga'anna uinri'i lhe'e ka sá atti reyaka leri'i?

25 Lee nna bekabie, ree kana:

—¿Si ni tsa abittu chi belabale lo yetsi ge Tata Do Yebáha ata rigixxi'a bí ben David-ni ttu libeha? Yule benneha itupa lenie ka benne ugweki lenie la'ania, tti bituinkeha nna biyaskanie nu goke. **26** La'ania uta'a David-ni lhe'e yotu ge Tata Do Yebáha atti anka Abiatar-ni bixxudi xeni. Nianna utoe ka yettaxtila ka nu chi riesike ankake sun tteba ge Tata Do Yebáha, anágaba nna begwegabe ka benne se'e lenie la'ania ki utoke benneha, delába utoke ka yettaxtila ka nu labí ga'anna go attu benne subi, sunruba ka bixxudiha gwaka gokana benneha.

27 Jesús-ni nna rágabe kana:

—Ka sá tti reyaka leri'i-na ukakana ki ri'i ixuinri'i kana, laa uligari'i kini nu innála ka sá-na uinri'i. **28** De nuha nna neti benne daya yebáha, netiba ankaa xxana ka sá reyaka leri'i. De nuha nna gwa teebe lo neda kia inná bixa dika uinri'i lhe'e ka sá reyaka leri'i.

Jesús-ni beyonie nubiyú daa yatti náníha

(Mt. 12:9-14; Lc. 6:6-11)

3 ¹Jesús-ni uta'abie attu libe lhe'e yo'o ata rudheti ka benne Israel-ni ka tisa ge Tata Do Yebáha. Niha re ttu benne biyú daa yatti ttu lha'a nábie. ²Ka fariseo-ni nna rulhatsibakana ge Jesús-ni ganna gweyonie benneha la sá tti reyaka lekaniha, kini anáchu nna tee ro'okani bixa usiakana ikie. ³Nianna tti ra Jesús-ni benne daa yatti neeha:

—Udú lii nna utá udú lagwi-ni.

⁴Nianna tti unnaba tise kana, ree kana:

—¿Bí ga'anna uinri'i lhe'e ka sá tti reyaka leri'i? ¿Si uinri'i latsiru ak? ¿O uinri'i nu satsa ak? ¿Si odilári'i ttu benne? ¿O ugwelhari'i gattie ak?

Ttaka lakana siiba ukakana, labí bekabikana gebie.

⁵Jesús-ni nna risa'abanie rulannie lo ka nu se'e abi'iba kwe'eeha nna si'iba bedúna lebie kumu de ruin tsitsi lastokani, labí ria lekani. Nianna tti ree benne biyúha:

—Belhí nálu.

Benneha nna belhí tteba nábie nna beyaka tteba nuha. ⁶Tti beria ka fariseo-ni lhe'e yo'oha nna unne tteba lenkana ka nu tákana Herodes-ni, kumu regila lekani gaxasina uinkana kini uttikana Jesús-ni.

Ixe juisiru ka benne danalhake Jesús-ni

⁷Jesús-ni nna beru'une deyye len ka benne rudhetinieha daka ro'o indatooha nna ixé juisiru ka benne ge Galilea-ni danalhake bie. ⁸Anágaba ka benne daa itúba daka Judea-ni lhe Jerusalén-ni lhe ka benne daa daka Idumea lhe ka benne se'e attu ladu yoo Jordán-ni lhe. Anágaba nna dágaba ka benne se'e abi'iba kwe'e yiesi Tiro lhe Sidón lhe. Ixe juisiru ka benneha, tti biyienkanie iyá nu runieha nna danalhake bie.

⁹De nuha nna ra Jesús-ni ka benne rudhetinieha udú tseke ttu barcu kini tsapie loni ki abittu ukí ya'a ka benne bie. ¹⁰Kumu de ixé galá ka benne chí beyonie, de nuha nna iyába ka benne raka latike ttu bixa, xua-niba iki luesike diake kwe'ebie kumu de raka leke sattanke latie. ¹¹Ka espíritu satsa yu'u lati ka benne, atti rilákin nuha Jesús-ni nna ribesi'abakana rudú xibikani arloe, rákane:

—¡Lu ankalu Xi'in Tata Do Yebáha!

¹²Ttaka labie nna bedhaka dise ka espíritu satsaha kini abittu kixxi'akana nuxa anke.

**Jesús-ni bekwebie tsi'inu (12) ka benne
kini tsiake kixxi'ake ka tisa geeha**
(Mt. 10:1-4; Lc. 6:12-16)

¹³Iki de nuha nna ugwapi Jesús-ni iki i'iyaha, nianna uxie ka benne uka lebie gaxie. Ka benneha nna ubigake kwe'ebie. ¹⁴Nianna tti bekwebie tsi'inuke (12) kini tseki lenke bie lhe kini idhelhe ke tsiake kixxi'ake ka tisa ge Tata Do Yebáha. ¹⁵Anágaba nna begwegabe ka benneha lo neda ki eyoinke ka benne rani lhe ki ebeake ka espíritu xxegwi yu'u lati ka benneha lhe. ¹⁶Nii dia lá tsi'inu (12) ka benne bekweeha, delába, Simón benne utixxagabe lábie Pedro, ¹⁷lhe Jacobo-ni lenie betsie Juan-ni. Ka benne-ni ankake xi'in Zebedeo. Lagabake nuha utixxe láke Boanerges. (“Boanerges” dienna innána ka nu ru'u be idisa.) ¹⁸Bekwegabe Andrés, lhe Felipe, lhe Bartolomé, lhe Mateo, lhe Tomás, lhe Jacobo xi'in Alfeo, lhe anágaba Tadeo, lhe Simón benne rágabakana Zelote, ¹⁹lhe bekwegabe Judas Iscariote nu betene lasi ná ka nu bettikaneha.

**Rusiakana iki Jesús-ni deki rixúnie Beelzebú-ni ki rebeabie
ka espíritu xxegwi yu'u lati ka benne**
(Mt. 12:22-32; Lc. 11:14-23; 12:10)

²⁰Iki de nuha nna beyeki Jesús-ni besine lhe'e yo'oha, nianna bedetupa tteba ixeru ka benne. Laxkala niba yetta laa uka go lenie ka benne chi bekwebieha. ²¹Tti bina ka benne raka luesieha ge nu runieha, nianna ugíake kini saxíke bie kumu ráke rakaba ikie.

²²Ttaka ka nu rule'ekinna ka benne nu ra lo bia bennabi bodha'an Moisés-ni, delába ka nu daa Jerusalén-ni, ka nuha nna rákana deki Beelzebú nu anka xxana ka espíritu xxegwiha-ba yu'u lati Jesús-ni, laxkala Beelzebú-niba rixuin Jesús-ni kini rebeabie ka espíritu xxegwi yu'u lati ka benne.

²³Nianna tti uxi Jesús-ni ka nu rinne aníha nna utixxi'anie kana ttu tisa. Aníha benie kini utte dákana bí diani nu raka lebie kixxi'anie kana, nianna tti ree:

—Laa gwakaga ge nu xzegwiha ebeana ka luesi xzegwi-niha. ²⁴Ttibanka ganna ttixka lhe'e ttu yiesi se'e la'a ka benne geni de rithla len luesike, la'ania nna labíru uchía yiesiha lo nu ratenaha ²⁵lhe ganna ttixka ka benne se'e lhe'e ttu yo'o se'e la'ake de rithla len luesike, la'ania nna labíru aka tse'e ka benneha tutupa. ²⁶Anágaba nu xzegwiha, ganna itilha lenna ka luesi xzegwi-niha, la'ania nna labíru aka dhona tutupa len ka nuha. Ganna aníha uinna, la'ania nna chiba bisia sá ge nuha lhuxana.

²⁷'Anágaba lhe lanú nu aka geni ga'ana lhe'e yo'o ge ttu nubiyú ankana tipa kini lhanana nu se'e lhe'e yo'o ge nuha, ganna ttixka abíba udaxxuna nubiyú anka tipaha lade'a tte nna uxkikana nuha. Kumu gannaliba chi xikinna nubiyúha, la'anialiba nna gwaka geni lhanana nu se'e lhe'e lisi nuha.

²⁸'Netiru ria: gwadíba Tata Do Yebáha elha xen lasi ge iyába nu satsa uni ka benne lhe ge iyába nu satsa inneke lhe, ²⁹ttaka ganna ttu benne inne satse ge Espíritu ge Tata Do Yebáha, benneha ttu tsala labí ixú elha xen lasi gebie, sinuki ttu dia liiba uja benneha yua ge nu inneha.

³⁰Aníha ra Jesús-ni kumu ka nu rule'ekinna ka benne nu ra lo bia bennabiha rálakana deki espíritu satsaba yu'u latie.

Nan ge Jesús-ni lhe ka betsieha lhe raka leke inne lenke bie
(Mt. 12:46-50; Lc. 8:19-21)

³¹Nianna tti bisin nan ge Jesús-ni lhe ka betsieha ro'o yo'o ata do Jesús-ni rule'enie ka benne. Ro'o yo'oha-liba use'e ka nan geeha nna udhelhake kini belisakana Jesús-ni. ³²Ka benne se'e abi'iba kwe'eeha nna unneke, ráke bie:

—Ne nan geluha lhe ka betsiluha lhe ka danluha lhe, se'eke ro'o yo'o-ni regilake lu.

³³Lee nna bekabie ree:

—¿Nú rale deki anka nan kia lhe betsia lhe?

³⁴Nianna tti belannie lo ka benne se'e abi'iba kwe'eeha nna tti ree:

—Gwaluyúruuga, ka benne se'e-nila nuní ankake nan kia lhe betsia lhe. ³⁵Kumu nuxaba benne ganna runie nu ru'u le Tata Do Yebáha, benneha nuha anke betsia lhe danaa lhe nan kia lhe.

Jesús-ni rigixxi'abie ge ttu benne dia gwedelha xuxtila

(Mt. 13:1-23; Lc. 8:4-15)

4 ¹Jesús-ni bededuloe attu libe rodole'enie ka benne ka tisa ge Tata Do Yebáha ro'o indatooha nna ixé juisiru ka benne bedetupake abi'iba kwe'ebie. Laxkala teeki ugwapie lo ttu barcu daa lo indaha nna udoe lhe'e nuha. Ka benne tupaha nna ro'o indaha-liba se'eke rudo nagake gebie. ²Ixeba nu rigixxi'anie ke. Aníha benie ki utte dáke bí diani nu raka lebie kixxi'anie keha, nianna tti ree ke:



(Marcos 4:1)

³—¡Gwaludoruga nagale! Ttu nubiyú ruin sina biriana diana gwedelha xuxtila. ⁴Tti dana gwedelha xuaha nna adí benneha utse ro'o nedaha, nianna tti biginni ka binniha, nna bediga ttebakana benneha. ⁵Attu chupe nna utse lo íyya atta'a ata labí gwadilo yu do. Benneha nna gwa be'eyu ttebe kumu de labí rea xua yuha niha. ⁶Ttaka tti biria tatubisaha nna bettebe benneha kumu de labí lhi'u dia lhue, de nuha nna ubisi tteba benneha. ⁷Attu chupe nna utse lhe'e yietsiha, ttaka yietsiha biyelhabana nna belhiubinna benneha. Laxkala labí xua bete benneha. ⁸Ttaka adí benneha nna gwa ubinnibe ata do yu tse. Benneha nna yalhá lhe'e be'eyue lhe biyelhe lhe.

Laxkala tseba betebie lena. De rerua (30) lhe de gayuna (60) lhe de gayua (100) tteba xua bekudhi iki ttu ttu ka xuxtilaha.

⁹Nianna tti ra Jesús-ni ke:

—¡Ata sia nagale, gwaludo nagale ganna gwankale nu dika iyienini!

¹⁰Atti chi beya'an Jesús-ni sun ttúbe lenie ka benne tsi'inu rudhetinieha (12) lhe attu chupa ka benne se'e gaxxaba ata dueha lhe, nianna tti unnaba tisake bie, ráke bie:

—¿Bí diani nu ralu tti utixxi'alu ge benne dia gwedelha xuxtilaha?

¹¹Labie nna ree ke:

—Lebi'iligaba nna gwagixxi'abin Tata Do Yebáha le nu labí chi yu adí ka benne, delába gwa ruinba Tata Do Yebáha kini tte denle gasina innabie ka benne. Ttaka ka benne abittu chi rinnabie, neti bixxi kwe'eba rinnea tti rigixxi'ania ke nuní,

¹²kini meskiba gwa rulannike nna labí ilákanie,
 lhe meskiba gwa rudo nagake nna labí tte dákane;
 aníha kini ka eyekike nna odaxxuke neda ge Tata Do
 Yebáha,

lee nna dhie elha xen lasi geke.^d

¹³Nianna tti ree ka benneha:

—¿Si lagwa gwa rite denle bí diani nu utixxi'aya ge benne dia gwedelha xuxtilaha? ¿Galasina tte denle adíru ka nu kixxi'ania le ganna? ¹⁴Benne rudelha xuxtilaha anke benne rigixxi'e ka tisa ge Tata Do Yebáha. ¹⁵Ka xua utsa kwe'e nedaha nna ankake ka benne biyienkanie ka tisaha. Ttaka daa tteba nu xxegwiha nna rebea ttebana ka tisaha lhe'e lastoke; delába ruinna kini rexulhakanie ka tisa chi biyienkanieha.

¹⁶Adíke nna ankake ttiba ka xua utsa lo íyya atta'aha. Tti biyienkanie ka tisaha nna ittaba bedúna leke nna bedaxxu ttebake ka tisaha. ¹⁷Ttaka kumu de labí chi begwe lhu ka tisaha lhe'e lastoke, de nuha nna sattiruba ria leke ge Tata Do Yebáha, nna atti chi rateke ttu bixa elha disa o lhe atti chi ridú nookana ke de ria leke ka tisaha, la'ania nna reyadi gaa ttebake. ¹⁸Alhe ka benneha nna ankake attiba ka xua utsa lhe'e yietsiha. Gwa riyienbakanie ka tisaha, ¹⁹ttaka ka elhaxchacha iki geke tee yiesi lo yu-ni lhe de rudo xxattana

^d 4:12 Isaías 6:9-10

leke gatta geke, lhe anágaba lhe de ru'u xxatta leke ge adíru nu tee yiesi lo yu-ni, nuha-la rudoruna leke ruinke, de nuha nna richúbana lo ka tisaha. La'ania nna labí ruin ka tisaha sina lhe'e lastoke kini uin tseke. ²⁰ Adíke nna ankake attiba ka xua ubinni lo yu tseha. Ka benneha nuha riyienkanie ka tisaha nna bedaxxuke ka tisaha. Laxkala gwa ruinba ka tisaha sina lhe'e lastoke. Ka benneha nuha ankake attiba ka xuxtila bete de rerua (30) lhe de gayuna (60) lhe de gayua (100) lhe.



(San Marcos 4:1-20)

Jesús-ni rabie: “Labí ttu bixa raka sigá abittu una benne geni”

(Lc. 8:16-18)

²¹Rágaba Jesús-ni kana:

—Ttu gi rudenna ki ilenri'i, laa taxxígari'i nuha kini uttudhiri'i ttu almoti ikini o ukatsiri'i na xan ata rattari'iha. ¿Laaba ganna teeki udori'i nuha gwetsá ki udenna geri'i?

²²Anágaba labí ttu bixa tee gatsi nu abittu ilenri'i lhe labí ttu bixa raka sigá abittu iriana la loo. ²³¿Ata sia nagale, gwaludo nagale ganna gwankale nu dika iyienini!

²⁴Lhe rágabe kana:

—Gwaludo tsitsi nagale gasina rutte dale nu rinnea-ni, kumu ttu luesi nu rurixxibiale rugwele ka benne, ttu luesi nuha-gaba orixxibia Tata Do Yebáha otebie gele. Benneha nna adírula xxeni otebie gele. ²⁵Kumu nu gwa tee geniha, gwadí

chiettirula nuha nna nu abittu tee geniha nna axtala nu ttu latti chi tee geniha etua.

Jesús-ni rigixxi'abie gasina riyelha ka xuxtila

26 Jesús-ni rágabe:

—Tata Do Yebáha atti rinnabie ka benne, elha rinnabia geeha raxxína na len nu ruin ttu benne dia gwedelha xuxtila.

27 Benneha rattabe ra'adhie rela nna rani nna radhabe. Xua bedelheha nna rela resába dia benneha re'eyue lhe riyelhe lhe. Benne bedelha xuaha nna labí yue gasina raka, **28** kumu titúba yuha re'eyu lena loni. Lade'axa riria lhaga to ge xuaha, nianna tti ribea ikie. Iki deliba nuha nna tti chi ru'u lhe'ebie.

29 Ganna chi bigatsi xuxtilaha, la'ania nna udaxxu tteba iyyarsela ge benne bedelha xuxtilaha kini egitse benneha kumu chiba bisia sá exú benneha. Aníha-ba raka atti rinnabia Tata Do Yebáha ka benne.

Jesús-ni rigixxi'abie ge ttu besi ge kuana muxtasa

(Mt. 13:31-35; Lc. 13:18-19)

30 Jesús-ni rágabe:

—¿Gasina rule'e tti rinnabia Tata Do Yebáha ka benne? ¿Bí nuha rula'a tti rula'a elha rinnabia geeha? **31** Tata Do Yebáha atti rinnabie ka benne, elha rinnabia geeha ankana ttiba ttu besi ge kuana muxtasa riyada lo yu. Besiha-la nuha ankana nuxka'a toru delo iyá ka besi re'eyu yiesi lo yu-ni. **32** Ttaka iki de chi riyada besiha nna gwa re'eyubana. Nianna rixenba kuanaha nna xxenirula rakana attichula adí ka kuana ya'a. Xxeniba raka ka nání, laxkala axtaba ka binni-na ratsiakana xula geni.

33 Ixeba luesi ka tisa-ni bixúni Jesús-ni ki unnebie. Aníha benie kini tte dani ka benne nu raka lebie kixxi'anie ke. Utixxi'abanie ke nu dika dhaake tte dákanie. **34** Labí lhixxa rá utixxi'anie ke sinuki utixxi'abe nu raxxíbana len nu raka lebie ule'enie ke. Ttaka ka benne rudhetinieha, tti due sun len ka benneha-ba nna gwa rigixxi'abanie ke bí diani iyá tte nu reeha.

Jesús-ni benie kini bebe sii lo indatooha

(Mt. 8:23-27; Lc. 8:22-25)

35 La sáha-gaba nuha, atti chi dia ralhaha, nianna ra Jesús-ni ka benne rudhetinieha:

—Eteri'i lo indatoo-ni kini eriari'i ro'oni daka nu reha.

³⁶Niha-ba boka'anke ka benne ixé danalhaha nna aníha-ba dedo Jesús-ni lo barcuha, dechekane. Danalhagaba adíru ka barcu. ³⁷Ttaka ttiruba ttu nnelaba bisia ttu be idí nna bedhú liina lo indatooha nna uta'ana lhe'e barcuha. Laxkala chi tteba ruin nuha xxudina lhi'u lhe'e indaha. ³⁸Ttaka Jesús-ni nna tebe te'adhie daka xan barcuha kuni ikie ttu lari. Ka benne rudhetinieha nna bodibenke bie, ráke bie:

—¡Maestru! ¿Si bi gwa retabinlu ka tsapiri'i inda-ni nna gattiri'i?

³⁹Nianna tti ugwadhe bedhaka dise beha nna ree indatooha:

—¡Siiba beyaka!

La'ania nna udú sii tteba beha nna tsaba bebe sii lo indaha.

⁴⁰Nianna tti ra Jesús-ni ke:

—¿Beaka rasinle? ¿Beaka a ruxxen lele kia?

⁴¹Ttaka lake yalhá usikanie, nianna tti ra luesike:

—¿Nú anka benne-ni nna axtaba be-na lhe indatoo-na lhe rudokana tisa gebie?



(San Marcos 4:35-41)

Jesús-ni bebeabie espíritu satsa yu'u lati ttu nubiyú

(Mt. 8:28-34; Lc. 8:26-39)

5 ¹Beteba Jesús-ni lenie ka benne rudhetinieha lo indatooha nna bisinke daka lo yu ge ka benne Gadara. ²Tti ugwadie lo barcuha nna biria tteba ttu nubiyú yu'u ttu espíritu satsa latini, biriana ata se'e ka baa ge ka benne yattiha, nianna tti betetsána Jesús-ni. ³Lhe'e ka baaha-ba reya'an nubiyúha. Nurula ridaana uxxikana na, niruba len cadena. ⁴Ixe lidú chi bexxikake ka ni'a náni len cadena, ttaka richú ttebana ka cadenaha nna niruba ttu benne a ridee loni. ⁵Rela resába rekina iki ka i'yaha lhe lagwi ge ka baaha ribesi'ana lhe ruingaba gwe latini len ka íyya lhe. ⁶Idittuli daa Jesús-ni bilenne, nianna biresu ttebana gwatsáne nna bedú xibini arloe. ⁷Nianna tti unnena idisa, rane:

—¡Bittu etega'a gelu len neti, Jesús Xi'in Tata Do Yebaa benne ra xxeni leeha! ¡Rinnabaa lenlu, benchi lo ni'a ge Tata Do Yebáha bittu ugwelu neti elha disa!

⁸Aníha rana kumu Jesús-ni chi unnebie, ree:

—¡Espíritu satsa, beria lati nubiyú-ni!

⁹Nianna tti unnaba tise na nna ree na:

—¿Bí lálu?

Lana nna bekabina, rana:

—Legión-ba lá neti, kumu ixer ri'itu raka.

¹⁰Nianna unnaba ditiba nubiyúha len Jesús-ni kini abittu ebeabie ka espíritu satsaha latini nna odelhe kana attu ta subi. ¹¹Gaxxaba kwe'e i'iyá do niha yu'u ixeru ka kuchi, yu'ukana go. ¹²Laxkala ka espíritu satsaha nna unnaba ditibakana lenie, rákane:

—Bedhelha ri'itu ata yu'u ka kuchi-na, kini eta'atu latikani.

¹³Jesús-ni nna gwa begwelhabe kana. Nianna beria tteba ka espíritu satsaha lati nubiyúha nna gwata'akana lati ka kuchiha. Ttiba ttu chupa mili ka kuchiha raka. Ka nuha nna biria resu ttebakana gwatsettikana ro'o ttu íyya daa niha nna biginnikana lhe'e indatooha nna ugwapikana inda.

¹⁴Ka nu se'e gweyú ka kuchiha nna boxunni ttebakana deyyakana gwattixxi'akana nuha lhe'esihá lhe utixxi'akinna ka benne se'e lhe'exxi itúba ka niha. Ka benneha nna biria

ttebake gwalannike bixa nuha chi uka. ¹⁵Tti bisinke ata du Jesús-ni nna bilákanie nubiyú beria ka espíritu xxegwiha latini, tseba chi bedo ikini lhe chiba nuku xoni dona. Nianna yalhá usikanie. ¹⁶Ka benne bilákanie nu gwate nubiyú uyu'u espíritu xxegwi latiniha lhe nu gwate ka kuchiha lhe, ka benneha nna utixxi'agabakanie adí ka benne. ¹⁷Nianna tti unnaba ditibake len Jesús-ni kini eriabie lo yu gekeha nna eyye attu ta subi.

¹⁸Atti beyapi Jesús-ni lo barcuha nna nubiyú beria espíritu xxegwiha latini nna unnaba ditibana lenie kini ugwelhe na sanalhane. ¹⁹Ttaka lee nna labí uka lebie nna ralee na:

—Beyya lisiluha ata se'e ka benne geluha, nna utixxi'a kanie iyá nu chi ben Tata Xisiha lenlu lhe utixxi'a kanie gasina gwatua lebie lu.

²⁰Nubiyúha nna bedá ttebana deyyana. Nianna udulo ttebana utixxi'ana itúba daka Decápolis ge iyá nu chi ben Jesús-ni lenna, nna iyába ka benne binake nuha nna bebanabakanie.

**Jesús-ni beyonie ttu benne nuila lhe beyoingabe
xi'iniunná Jairo-ni lhe
(Mt. 9:18-26; Lc. 8:40-56)**

²¹Iki de chi beyapi Jesús-ni lo barcuha nna betebie lo indatooha, besine ro'oni daka nu reha. Nianna bedetupa tteba ixé juisiru ka benne kwe'ebie. Labie nna ro'o indaha-liba udúe. ²²Nianna tti bisin ttu ka nu baninna yo'o ata rudheti ka benne Israel-ni ka tisa ge Tata Do Yebáha. Nubiyúha lána Jairo. Tti bilenna Jesús-ni due niha, nianna biyachuna nna bedú xibini arloe, ²³nna unnaba ditibana lenie, rane:

—Nuila to kiaha chi tteba gatti bi'iniha. Uyáchi nna ixhua nálu ikibi kini eyakabi nna abittu gattibi.

²⁴Nianna udá tteba Jesús-ni die lenna.

Ixe juisiru ka benne danalhake bie nna rukí ya'anibake bie. ²⁵Lagwi ge ka benne danalhaha sela ttu benne nuila chi anka tsi'inu (12) ida ridobie reni. ²⁶Yalhá chi gwatebie ugíe lo ixeba ka nu runi ramedí nna chiba beyá iyába nu tee gebie betse'e loobie. Ttaka labí reyake; rutse'e loo nna adíla diana rudialhana gebie. ²⁷Tti bine ge Jesús-ni, nianna diabie sele

lagwi ge ka benne danalhaha, nianna tti ubige daka kwe'e Jesús-ni g wattáne ro'o lari nuku benneha, ²⁸kumu rakanie: “Kwadiba ro'o xoe sattánaa nna gweyakabaa.” ²⁹Laxkala atti g wattáne ro'o xo Jesús-ni nna loora tteba udú sii reni ridoeha, nianna ute danie deki chiba beyake. ³⁰Jesús-ni nna tti ute danie deki nu tsitsi ra leeha chi beyoinna ttu benne, nianna tti bodeki loe rulannie lo ka benne danalhaha nna ree ka benneha:

—¿Núnni chi betettanna ro'o xoa-ni?

³¹Ka benne rudhetinieha nna ráke bie:

—Sa ralu, ¿núnni betettanna ro'o xoa? Ki gwa yu xeabalu aníli rukí ya'a ka benne ri'i.

³²Ttaka Jesús-ni nna rulannibe abi'iba kwe'ebie kini ilánie nuxa nuha g wattána na ro'o xoeha. ³³Benne nuilaha nna kumu yube nu chi ukaha, aníha uka nna itú rasibanie lhe itú rixidibe ubige nna bedú xibie arlo Jesús-ni, nianna tti utixxi'anie bie iyá tte. ³⁴Labie nna ree benne nuilaha:

—Xi'ini to, de ugía lelu deki gwadaabaa eyonia lu, de nuha nna gwa beyakabalu. Nnanna nna xen su lasi beyya. Chiba betúa nu ridakalu-na.

³⁵Sa dula Jesús-ni rinnebie, ttiru chi bisia ka nu daa lisi Jairo-ni, rákana Jairo-ni:

—Chiba utti xi'iniunnáluha. Bitturu udo doelhalu maestru-ni ki dhabie.

³⁶Ttaka Jesús-ni labí bedo nage ge nu ra ka nuha, nianna ree Jairo-ni:

—Bittu gasinlu; sun tteba ugía lelu.

³⁷Nianna udá ttebe die nna lanúru nu begwelhe tsia lenie. Sunruba Pedro-ni lhe Jacobo-ni lhe Juan betsi Jacobo-ni chebie. ³⁸Tti bisinke ro'o yo'o ge Jairo-ni, nianna bilánie chi risatsa ka benne lhe bilánie ka benne ribesike lhe relen xxattakanie lhe. ³⁹Atti chi ute'e lhe'e yo'oha nna ree ka benneha:

—¿Beaka análi ruinle lhe beaka ribesi xxattale lhe? Nuila to-ni labí utti bi'in-ni, te'adhiba bi'in-ni.

⁴⁰Ttaka ka benne se'e niha, nna ruxisilake gebie. Lee nna nu benlee nna bebealee iyábake, nianna tti ute'e ata tee nuila toha. Ute'e len ka tata nan gebiha lhe len a tsunna

ka benne cheeha lhe. ⁴¹Nianna tti bedaxxue ná nuila toha nna unnebie, ree:

—Talita kumi. —Talita kumi dienna innána: Nuila to, neti rulisaa lu, beyadha.

⁴²Looraha tteba beyadha nuila toha nna bedá ttebabi, kumu chiba ankinbi tsi'inu (12) ida. Ka benne se'e niha nna uka tébakanie lhe yalhá bebanakanie lhe. ⁴³Ttaka Jesús-ni nna bodha'an tsitsibe ree ke anuttu nu kixxi'akanie ge nu chi ukaha lhe rágabe ke:

—Gwalugo nuila to-ni yetta.

Jesús-ni besine lhe'esi Nazaret

(Mt. 13:53-58; Lc. 4:16-30)

6 ¹Bedába Jesús-ni ata dueha nna deyye lhe'esi Nazaret ata uka lasieha nna deyyagaba ka benne rudhetinieha lenie. ²Tti bisia sá tti reyaka le ka benne Israel-ni, nianna uta'a Jesús-ni lhe'e yo'o ata rudhetike ka tisa ge Tata Do Yebáha nna uduloe rule'enie ka benne. Ixeba ka benne se'e rudo nagake gebie nna bebanabakanie, nianna ra luesike:

—¿Gá gwaxxí nuní nu raka gen-ni? Lhe, ¿bí elha rieni nuní rapa nuní? Lhe anágaba lhe, ¿gá gwaxxína ka milagru ruinna-ni? ³¿Laaba nuníba nuha nu ruin ka mexaha lhe ka xxilaha lhe? Lana ankana xi'in biyú María-ni, lhe anágaba lhe rakana betsi Jacobo-ni lhe José-ni lhe Judas-ni lhe Simón-ni lhe. Anágaba lhe, ¿laaba lhe'esi geri'i-nigaba se'e ka danniha lhe?

De nuha nna bituxxukinna gebie. ⁴Nianna ra Jesús-ni kana:

—Ttu benne anke profeta, gaxaba diabie gwa rugwebakana lidhake. Ttaka ka nu lhe'esi geeha lhe ka nu raka luesieha, lhe anágaba ka nu se'e lhe'e yo'o geeha lhe, labí rugwekana lidhaka benneha.

⁵De nuha nna labí uka uni Jesús-ni ni ttu milagru lhe'esi geeha, sunruba ttu chupa ka benne rani uxxua nábie ikike nna beyonie ke. ⁶Lee nna bebanabanie gekani kumu de labí ria lekani gebie.

Iki de nuha nna tti ugwekie lhe'e iyába ka yiesi se'e abi'iba niha bele'enie ka benne.

**Jesús-ni udhelhe ka benne rudhetinieha
kini tsiake kixxi'ake ka tisa geeha**

(Mt. 10:5-15; Lc. 9:1-6)

⁷Jesús-ni bottupe ka benne tsi'inu (12) rudhetinieha nna udhelhe chupa chupa ka benneha. Begwebie ke lo neda ki ebeake ka espíritu satsa yu'u lati ka benne. ⁸Nianna rabie ke:

—Bittu ichele nu ixuinle neda. Suna garroti gebale ichele. Nigaba bittu uja chuba gele dhe nigaba bittu ujale nu gole dhe anágaba bittugaba iche yieti belhiu gele. ⁹Suna gwaracha gebale gwalulea dhe bittugaba ichele chupa kwe xole dhe.

¹⁰Rágabe ke:

—Gaxaba dhe'e yo'o ata isinle, niha-ba gwaltse'e. Axtaliba ganna chi eriale dhe'esiha, la'anialiba nna edále dhe'e yo'o ata bisinleha. ¹¹Ganna dhe'e ttu yiesi abittu ulabikana le dhe abittu udo nagakani ge nu kixxi'enle kana, la'ania nna gwaleria dhe'e yiesiha nna gwalukubi biste ni'ale, kini nuha unna liina deki Tata Do Yebáha labí uyu'u lee nu benkana. [Netiru ria, ganna chi bisia sá uin Tata Do Yebáha elhuxtisi ge ka benne se'e yiesi lo yu-ni, la'ania labí ttela elha disa tsitsi uyú ka benne ge Sodoma dhe ka benne ge Gomorra dhe, attichula elha disa uyú ka nu abittu ulabikana leha.]

¹²Ka benne rudhetinieha nna biriabake diake nna rigixxi'akanie ka benne ráke ke deki teeki odúna ke nna odaxxuke neda ge Tata Do Yebáha. ¹³Dhe anágaba dhe bebeagabake ixé ka espíritu xwegwi yu'u lati ka benne dhe rigabigabake seti lati ka benne rani nna gwa reyakabake.

Juan benne rugadi indaha uchúkana bega ikie

(Mt. 14:1-12; Lc. 9:7-9)

¹⁴Herodes nu rinnabiaha binana ge Jesús-ni kumu dhe'e iyába ka yiesi chi ugwadhi tisa ge nu runieha. Ttu chupa ka benne ráke:

—Juan benne rugadi indaha-ba nuná chi beyaka benbie lagwi ge ka benne chi uttiha. De nuha nna ridaabie runie ka milagru.

¹⁵Adíkana nna rákana:

—Elías-niba nuná.

Adíkana nna redenákana:

—Ttu ka profeta use'e itú nu reha-ba nuná.

16Tti biyienin Herodes-ni nu ra ka benneha, nianna tti rana:

—Juan nu begadi indaha-ba nuná, delába nu udhelhaa kini uchúkana ikiniha. Labana nuná chi beyaka benna lagwi ge ka benne chi uttiha.

17-18Kumu kwinaba Herodes-ni udhelhana gwadaxxukana Juan-ni nna bexxikakana na lhe'e lisiyyaha. Aníha benna de utisa Juan-ni na delo ni'a ge de bedo lenna Herodías nu anka nuila ge betsini Felipe-ni. Bituxxuín Herodes-ni kumu de ra Juan-ni na: “Labí ga'anna edo lenlu nuila ge betsilu-na.” **19**De nuha nna bedo le nuilaha Juan-ni nna benna uttina na, ttaka labí udaana, **20**kumu Herodes-ni usibinna Juan-ni, kumu yúbana deki benneha anke ttu benne runie nu dika ixú lhe ankagabe ge Tata Do Yebáha lhe. De nuha nna biyú tsitsibana Juan-ni nna atti rudo nagani ge benneha, nna gwa ru'uba leni ge nu rigixxi'anie naha, meskiba tti riyieninna nu rinneeha nna rudú chupana leni. **21**Ttaka tti bisia sá gwadoni Herodes-ni ida, la'ania nna uxina adíru ka nu yala rise'e kwe'eniha lhe ka nu loni ge ka soldaduha lhe anágaba ka nu ra xxeni lekani se'e Galilea-ni lhe, kini i'iya gokana lenna. La'ania nna Herodías-ni, delába nuila ge Herodes-ni, upana lo neda benna nu rulaba leniha. **22**Tti lo se'e ka Herodes-ni ro'o mexaha, la'ania nna uta'a xi'iniunná Herodías-ni ata se'ekanaha nna udulona ruya'ana. Herodes-ni nna uyu'uba leni lhe ka nu se'e lenna ro'o mexaha lhe. Nianna tti rana nuila kwitiha:

—Unnababa bixaba raka lelu, neti nna gutebaa nuha gelu.

23Nianna tti bodha'an tsitsi tisa geni len nuilaha, rana nuha:

—Bixaba raka lelu innabalu nna gutebaa na gelu. Meskiba salhe ka lo yu ata rinnabiaya-ni utea gelu.

24Nuilaha nna beria ttebana deyyana nna rana nan geniha:

—¿Bíla innabaa ganna?

Nan geniha nna rabie na:

—Bega iki Juan nu rugadi indaha unnaba.

25Nianna rigába nuila kwitiha beta'ana ata re Herodes nu rinnabiaha, nianna tti rana na:

—Looraha tte nnanna raka lasia taxxílu bega iki Juan nu rugadi indaha nna ku'ulu na lhe'e ttu ye'ena nna utelu na len neti.

²⁶Meskiba bedú si'i xxattana le Herodes-ni, ttaka de chi bodha'an tsitsi tisa geni len nuilaha lhe de chi biyienin ka nu se'e lennaha lhe, aníoka nna labí uka dhu disana utena nu rinnaba nuilaha. ²⁷Nianna tti udhelha ttebana ttu soldadu kini tsia nuha taxxína bega iki Juan-ni. ²⁸Soldaduha nna ugía ttebana gwachúna bega iki Juan-ni lhe'e lisiyyaha. Nianna tti begu'una bega iki benneha lhe'e ttu ye'ena nna bogwena nuila kwitiha. Nuila kwitiha nna botena nuha len nan geniha.

²⁹Atti chi bina ka benne rudhetini Juan-ni nu chi ukaha, nianna ugía ttebake gwaxíke benne yattiha nna bekatsike benneha.

Jesús-ni begobie gayu mili ka benne

(Mt. 14:13-21; Lc. 9:10-17; Jn. 6:1-14)

³⁰Atti besin ka apóstol-ni ugíake gwattixxi'akanie ka benne ka tisa ge Tata Do Yebáha, nianna betupa ttebake len Jesús-ni nna utixxi'akanie bie ge iyá nu benke lhe iyá nu bele'ekanie ka benneha lhe. ³¹Jesús-ni nna ree ke:

—Sun lebi'iba gwaltá tsiari'i ata anuttu benne se'e kini eyaka lele latti.

Aníha ree ke kumu ata se'ekeha ixeba benne risia lhe redá lhe, laxkala niba neda a rapake goke.

³²Aníha uka nna bedaxxuke barcu nna sun labake diake ata lanú benne se'e. ³³Ttaka ixeba ka nu bilákinna ke diake nna beyoinbiabakana ke. Nianna biria ttebakana lhe'e iyába ka yiesi se'e niha, nna ni'abakani diakana bisinkana ata isinkeha. Laxkala chila se'ekana niha atti bisinke. ³⁴Tti ugwadi Jesús-ni lo barcuha nna bilánie chi re xxatta benne niha. Nianna gwatua lebie ke kumu se'ebake attiba ka neru to anú tee tsekina lokani. Nianna tti uduloe ixeba nu bele'enie ke. ³⁵Ttaka chi galá dia ubisa-na nuha, nianna tti ubiga ka benne rudhetinieha nna ráke bie:

—Ttiruba chi dia ura nuní lhe gwea nna ata se'eri'i-ni yu bisiba nuní, labí bixa tee nii. ³⁶Bedhelhala ka benne-ni kini eyyake ata sia ka yo'o lhe'exxi o si lhe'e ka yiesi to se'e abi'iba ata se'eri'i-ni kini tayo'oke nu goke.

³⁷Ttaka labie nna bekabilee, ree ka benneha:

—Lebi'iba gwalugwe ka benne-ni nu goke.

Ka benne rudhetinieha nna bekabike, ráke:



(San Marcos 6:30-44)

—¿Gasina tayo'otu nu go ka benne-ni? Ixeni belhiu iyasinri'i; ge chupa gayua (200) sá sina teeba nuha ise'e loo kini iyo'o nu go ka benne-ni.

38 Jesús-ni nna ree ke:

—¿Balha yettaxtila chele? Gwatayúchu.

Atti chi gwalannikeha nna ráke bie:

—Ne gayuruba yettaxtila nna a chupa ka belha nna.

39 Jesús-ni nna ree ke:

—Gwalose'e ka benne-ni dhi dhi lo ixxi binni ya'a-ni.

40 Nianna dhi dhiba bese'e ka benneha, benne bese'eba de gayua (100) lhe benne bese'eba de tsieyona (50) lhe.

41 Nianna tti bedaxxu Jesús-ni gayu ka yettaxtilaha lhe a chupa ka belhaha nna tti belhidha loe yebáha nna begwebie Tata Do Yebáha ixkixaru. Nianna tti ulhe'e lhe'e ka benneha nna begwebie ka benne rudhetinieha, kini ka benneha nna utidhike benneha len ka benne se'e niha. Aníha-gaba benie len chupa ka belhaha, ulhe'e lhe'e ka nuha nna begwebie iyá tteke. **42** Iyábake utoke axtaba beyielakanie. **43** Iki de chi utokeha nna bottuparulake a tsi'inu (12) sumi ka yettaxtila ro'o salha'a bexxaha lhe nu bexxa ge ka belhaha lhe. Besá tí ka sumiha. **44** Ttiba ttu gayu mili ka benne biyúha utoke.

Jesús-ni ridábie lo indatooha
(Mt. 14:22-27, 34-36; Jn. 6:15-21)

⁴⁵Iki de nuha nna ben Jesús-ni kini beyapi ka benne rudhetinieha lo barcuha ki eneru gaake eyyake nna esinke ro'o indatooha daka nu reha, daka ata re lhe'esi Betsaida, laka lee nna richú tise ka benne se'e niha. ⁴⁶Tti chi beyaka uchú tise ka benneha, nianna tti ugwapie iki ttu i'iya do niha kini unne lenbie Tata Do Yebáha. ⁴⁷Atti chi ulhaha nna lagwi indatooha-li chi deyya barcu ata deyya ka benne rudhetinieha. Jesús-ni nna ttúbe beya'ane yu bisi. ⁴⁸Tti bilánie yalhá rate xxatta ka benne rudhetinieha ki rodháke barcuha, kumu daka arlo barcuha-la retetsu'u beha, lee nna tti chi daa tsaniha, dedábie ata dedá ka benneha, redábie lo indaha, runie etebie loke. ⁴⁹Tti bilákanie bie dedábie lo indaha, nianna ukakanie ganna nu du elaba nuha. Nianna uresi'ake, ⁵⁰kumu iyábake rilákanie nuha nna rasibakanie. Jesús-ni nna unne tteba, ree ke:

—¡Tsitsi gwalikweki lele! ¡Bittu gasinle! ¡Netiba nuní!

⁵¹Atti chi beyapie lo barcu ata dedákeha, nianna ure tteba beha. Lake nna uka tébakanie lhe bebana xxattakanie ge nu ukaha lhe, ⁵²kumu lake ituaba a rite dákanie ge nu uka tti begobie ka benne yettaxtilaha, kumu sa yayaba ikike.

⁵³Iki de chi beteke lo indatooha nna besinke lo yu ge Genesaret. Nianna begalhake barcuha ro'o indatooha. ⁵⁴Sun tteba ugwadike lo barcuha nna beyoinbia tteba ka benne se'e niha Jesús-ni. ⁵⁵Nianna ugweki tteba ka benne se'e niha lhe'e iyába ka yiesi se'e abi'iba niha kini raxxíke ka benne rani nna richeke ka benneha rixuakanie ke lo breta, risin lenke ka benneha ata runake du Jesús-ni. ⁵⁶Gaxaba dia Jesús-ni, sila ritebie lhe'e ka yiesi xka'a to lhe sila ritebie lhe'e ka yiesi elha lhe, o sila ritebie ka lhe'exxi ata se'e ka benne lhe, ata ritebieha niha ruse'eke ka benne raniha ro'o ka neda nna rinnabake len Jesús-ni, kini ugwelhe kwadiba ro'o lari nukueha udaxxu ka benneha kini eyakake. Aníha-ba ruin ka benne raniha rudaxxuke ro'o xoeha nna reyaka ttebake.

Nu satsa ruinri'i, nuná rutsigana ri'i arlo Tata Do Yebáha
(Mt. 15:1-20)

7 ¹Ka fariseo-ni lhe attu chupa ka nu rule'ekinna ka benne nu ra lo bia bennabi bodha'an Moisés-ni, ka nuha

dákana lhe'esi Jerusalén-ni, nna ubigakana ata du Jesús-ni. ²Tti bilákinna tsigaba anka ná ttu chupa ka benne rudhetini Jesús-ni tti roke yetta; delába labí utí náke, labí benke ttiba labini ka benneola ge ka nu Israel-ni ruinkana, de nuha nna riguakana bala'ana ge ka benneha. ³Kumu ka fariseo-ni lhe adíru ka nu Israel-ni, sa ruinkana ttiba ben ka benneola gekaniha. Ka benneola gekaniha labí kwenta go ka nuha yetta ganna abíba chi utí nákaní, ⁴lhe anágaba tti resinkana riakana ugo'o lhe'eyya, labí kwenta gokana yetta ganna abíba chi utí nákaní. Ixerugaba nu labikinna ruinkana: ttibanka teeki kíkana ka kanti lhe ka xiga [ka nu rixúkinna kini ri'iyakana lhe'ekani] lhe anágaba adíru ka nu anka ge bronce ka nu rixúkinna ki riga'akana elho lhe'ekani. [Lhe anágaba, aloba teeki kíkana ka nu rise'ekana loni tti rokana yetta.] ⁵De nuha nna ka fariseo-ni lhe ka nu rule'ekinna ka benne nu ra lo bia bennabiha, unnaba tisakana Jesús-ni, rákane:

—¿Beakala ka nu rudhetinlu-na labí ruinkana nu bodha'an ka benneola geri'iha uinri'i? Ka nuná itupa tsigaba anka nákaní rokana.

⁶Lee nna bekabie ree kana:

—Lebi'i xa fariseo, labí liinle. Delo tisaba ruinle deki ankale benne tse. Gwalíbani profeta Isaías-ni tti unnena lo ka yetsi ge Tata Do Yebáha ge nu ruinle. Lo ka yetsi geeha rabie:

Ka nuní len ro'oruba ka nuní rákana
deki ria lekani neti,
ttaka labí gwalíkinna rakakinna kia.

⁷Kwentaruba rudú xibikani arloa,

kumu nu anka ge benne se'e yiesi lo yu-niba rule'ekana,
labí nu anka kia nuná rule'ekinna ka benne.^e

⁸Kumu lebi'i rudhanbale labíru ruinle nu bodha'an Tata Do Yebáha uinri'i, ge nu labin ka benne se'e yiesi lo yu-nila rudoruna lele ruinle, [delába rudorulana lele rigíle ka kanti lhe ka xiga ka nu ri'iyale lhe'ekinna, lhe anágaba nna ixerugaba ka luesi nuná labinle ruinle].

⁹Rágabe kana:

—¡Lebi'i, kattipa lhe'e ruinle! ¡Rigu'uba ni'ale nu bodha'an Tata Do Yebáha uinri'i nna rudorulana lele ruinle nu chi

^e 7:6-7 Isaías 29:13

labinle ruinle! ¹⁰Ki yule Moisés-ni bodha'anna rana: “Tsia lele ka tata nan gele”^f lhe rágabana: “Nu rigena iki ka tata nan geniha, ralhaba nuha gattina.”^g ¹¹Ttaka lebi'i nna rálale: “Ttu benne gwakaba gebie gee ka tata nan geeha: Labí aka utea nu tee kia-ni len lebi'i, kumu iyába nu dika utea len lebi'i, Tata Do Yebáha-la chi ga'anati ugwea bie nuní.” ¹²Aníha ruinle kini benneha nna abitturu utee nu daa loe ugwebie ka tata nan geeha. ¹³Aná tte nuná nna rig'u'u ni'ale ka tisa bodha'an Tata Do Yebáha delo ni'a ge nu rodha'an len luesile ruinle lhe anágaba nna ixerugaba ka luesi nuní labinle ruinle.

¹⁴Nianna tti bedexi Jesús-ni ka benne saa niha attu libe nna redeabie ke:

—Gwaludo naga iyále kia nna gwalutte da nu inná-ni.

¹⁵Labí nu rori'i rutsigana ri'i arlo Tata Do Yebáha, sinuki nu riria lhe'e lastolari'i nuná rutsigana ri'i arlo benneha. ¹⁶[iAta sia nagale, gwaludo nagale ganna gwankale nu dika iyienini!]

¹⁷Tti bedá Jesús-ni ata se'e ka benne tupa niha, nianna besine lhe'e yo'oha. Ka benne rudhetinieha nna unnaba tisake bie bixa diani nu utixxi'anie keha. ¹⁸Nianna ree ke:

—¿Si anágaba lebi'i, si abittugaba rite denle nu ria-ni? ¿Si lagwa gwa rite denle deki iyába nu rori'i-na laa nunága nuná rutsigana ri'i arlo Tata Do Yebáha? ¹⁹Kumu laa lhe'e lastogari'i dia nu rori'i, lhe'e tu'ebari'i dia nuná, delola nna rebeabari'i nuná.

Tti ra Jesús-ni aníha, benna liie deki iyába nu rori'i ankana nari.

²⁰Rágabe:

—Nu riria lhe'e lastolari'i nuná rutsigana ri'i arlo Tata Do Yebáha, ²¹kumu lhe'e lastolari'i nuná riria nu satsa rulaba leri'i,

lhe nágaba nuná riria nu ruinri'i ttixka rido lenri'i nu abittu anka latselari'i,

lhe nágaba nuná riria nu ruinri'i tti risári'i nu subi subi,

lhe anágaba lhe'e lastogabari'i riria nu rixegwiri'i ki ruinri'i elhutti,

^f 7:10 Éxodo 20:12

^g 7:10 Éxodo 21:17

22 [lhe ruinri'i ubana lhe].

Lhe anágaba lhe'e lastogabari'i nuná riria nu raka
 xxatta leri'i gatta geri'i,
 lhe nágaba nuná riria iyá nu abittu anka tse,
 lhe nágaba riria ka gwen lasi,
 lhe iyá nu satsa ridá leri'i ruinri'i,
 lhe anágaba, lhe'e lastogabari'i riria nu ritisin luesiri'i,
 lhe nágaba nuná riria nu rinne satsari'i ge ka benne,
 lhe nágaba nuná riria elha ttaba ruinri'i,
 lhe nágaba nuná riria nu ruinri'i tti a re itá ikiri'i.

23 Iyá nu satsa ruinri'i-na, lhe'e lastobari'i raka xxe nuná. Iyá nuní ruinna kini rutsigana ri'i arlo Tata Do Yebáha.

**Jesús-ni beyonie xi'iniunná ttu benne nuila
 abittu anke nu Israel**

(Mt. 15:21-28)

24 Bedába Jesús-ni ata dueha, nianna tti die daka Tiro lhe Sidón lhe. Tti chi bisine niha, nna ute'e lhe'e ttu yo'o. Labí uka lebie nuxa unana deki doe niha, ttaka labí uka dhoe gatsi,
25 kumu bina tteba ttu benne nuila do ttu xi'iniunne yu'u ttu espíritu satsa latini, bine deki do Jesús-ni niha. Nianna ugía ttebe nna bedú xibie arlo Jesús-ni. **26** Benne nuilaha nna unnaba ditibe len Jesús-ni kini ebebie espíritu satsa yu'u lati xi'iniunneha. Benne nuilaha labí anke nu Israel, sinuki benneha dabie daka Sirofenicia **27** Ttaka Jesús-ni nna bekabie ge benneha, ree:

—Begwelhaxa eyielani ka xi'inia-ni, delába ka benne Israel-ni. Kumu labí anka tse udaxxua yettaxtila nu dika go ka xi'inia nna udelhaa na lo ka beku to-na.

28 Benne nuilaha nna bekabie ree:

—Gwalí galenlu, xa tata. Ttaka yulu axtala ka beku to-na gwa redigagaba ka bia to-na ka yettaxtila ro'o yuya riginni xani'a mexa ge ka nuto-na.

29 Jesús-ni nna ree benneha:

—Gwalíba nu ralu-na. De bekabilu aná, de nuha nna xen su lasi beyya, kumu chiba beria espíritu xxegwiha lati xi'iniunnáluha.

30 Atti besin benne nuilaha lisieha nna gwaxxake xi'iniunneha tena, chiba beria espíritu xxegwiha latini.

Jesús-ni beyonie ttu benne anke kwechu

³¹Tti beyeki Jesús-ni beriabie Tiro, nianna deyye daka Sidón nna betebie daka Decápolis ki besine ro'o indatoo ge Galilea-ni. ³²Nianna bisin lenkana ttu benne ata du Jesús-ni. Benneha anke kwechu lhe labí rilí ro'e innee lhe. Nianna unnabakana len Jesús-ni ki ixxua nábie iki benneha kini eyake. ³³Jesús-ni nna bekwitta lenie benne biyúha ata se'e ka benne ixeha, nianna tti bega'a xubene lhe'e ka naga benneha. Nianna tti bettuttu xxenie lo xubene nna utane lo lhuse. ³⁴Nianna tti belhidha loe begié gwetsáha nna benné lebie, nianna tti unnee, ree:

—¡Efata! —Efata dienna innána: ¡Gwaleyali!



(San Marcos 7:31-37)

³⁵Looraha tteba beyali ka naga benneha lhe bolhána lhuseha nna tseba unnebie. ³⁶Jesús-ni nna ree ka benne se'e niha:

—Nuttu nu kixxi'enle ge nu chi uka-ni.

Ttaka meskiba bika ree ka benneha bittu kixxi'ake ge nu benieha, ttaka ka benneha nna adíla benke utixxi'abake.

³⁷Iyábake bebana xxattakanie nna ráke:

—¡Tseba anka iyá nu runie! ¡Redhalie naga ka benne anka kwechu lhe redhalie ro'o ka benne ankake biría lhe!

Jesús-ni begobie ttapa mili ka benne

(Mt. 15:32-39)

8 ¹Attu sá bedetupa ixie juisiru ka benne ata du Jesús-ni, ttaka labí nu goke tee. Nianna tti uxie ka benne rudhetinieha nna ree ka benneha:

²—Ratua lasia ka benne se'e nii, kumu chiba uka tsunna ubisa se'eke len neti nna birula tee bixa goke. ³Ganna suna anába ankake edhelhaa ke ki eyya lisike, la'ania nna ka satú leke, kumu adí ka benne-ni idittuba dáke.

⁴Ka benne rudhetinieha nna bekabike, ráke:

—¿Gála saxxíri'i nu go ka benne-ni? Ki lo yu bisiba nuní se'eri'i.

⁵Nianna ra Jesús-ni ke:

—¿Balha yettaxtila chele?

Lake nna bekabike ráke:

—Gasirubake chetu xa.

⁶Nianna benie kini bese'e ka benne tupa niha lo yu nna tti bedaxxue gasi ka yettaxtilaha nna iki de chi begwebie ixkixaru len Tata Do Yebáha, nianna tti ulha'abie lhe'e ka yettaxtilaha nna begwebie ka benne rudhetinieha kini kidhike benneha ge iyá ka benne se'e niha. Ka benne rudhetinieha nna aníha-ba benke. ⁷Ka benneha chegabake ttu chupa ka belha to nna iki de chi begwe Jesús-ni ixkixaru len Tata Do Yebáha, nianna tti redee ka benne rudhetinieha kidhigabake ka belhaha kini go ka benne se'e niha. ⁸Iyába ka benneha utobake axtaba beyielakanie nna bottuparulake a gasi ka sumi ka benne ro'o salha'a bexxaha. ⁹Tu ttu ttapa mili ka benneha utoke. Nialiba nna tti bodhíbie ka benneha deyyake. ¹⁰Lee nna beyapi ttebe lo barcuha lenie ka benne rudhetinieha nna bisinke daka Dalmanuta.

Ka fariseo-ni rinnabakana uin Jesús-ni ttu milagru

(Mt. 16:1-4; Lc. 12:54-56)

¹¹Tti bisin ka fariseo-ni ata du Jesús-ni, nianna udulo ttebakana uxaka lenkane. Raka lekani unie ttu milagru. Aníha ruinkana kini ku'ukane prueba ki ula'a ganna gwalí Tata Do Yebáha udhelhe bie.

¹²Jesús-ni nna benné lebie nna ree:

—¿Beaka raka le ka benne se'e nnanna ilákanie unia ttu milagru? Netiru ria: labí unia bixa ttu milagru ki ilákanie.

¹³Niha-ba bese'ebie ka fariseo-ni nna beyapie lo barcuha. Betebie lo indaha nna besine ro'oni daka nu reha.

Jesús-ni rabie: “Gwaluyú gele len ka fariseo-ni”

(Mt. 16:5-12)

¹⁴Ka benne rudhetinieha nna bixulhabakanie icheke nu goke, sunruba ttu túbi yettaxtila cheke lo barcuha. ¹⁵Nianna ra Jesús-ni ke:

—Gwaluyú gele ka iyietile kua dii ge ka fariseo-ni lhe kua dii ge Herodes-ni lhe.

¹⁶Nianna tti ra luesike:

—Ganna de abíba yettaxtila cheri'i, de nuha-ba nna rabie ri'i aná.

¹⁷Ttaka Jesús-ni nna ute dábanie nu rákeha, nianna tti ree ke:

—¿Beaka ra luesile deki labí yettaxtila tee? ¿Si itua ttu a rite denle lhe a rutte dale nu ria-ni? ¿Laa tuttíruba yaya ikile?

¹⁸¿Laaba gwa yu'uba iyya lole nna a rilenle lhe gwa siaba nagale nna a riyieninle? ¿Si lagwa gwa radú lele ¹⁹tti ulha'aya lhe'e gayu ka yettaxtila uto gayu mili ka benneha? La'ania, ¿a balha sumi besá ka yettaxtila ro'o salha'a bottupaleha?

Lake nna bekabike, ráke:

—A tsi'inu sumi (12).

²⁰Nianna redenee:

—Atti ulha'aya lhe'e gasi ka yettaxtila uto ttpa mili ka benneha nna, ¿a balha ka sumiha besá ka yettaxtila ro'o salha'a bottupaleha?

Lake nna bekabike, ráke:

—A gasi sumi.

²¹Nianna ree ke:

—¿Ganna aníha nna beakala a rite denle?

Lhe'esi Betsaida, niha bedhali Jesús-ni lo ttu benne xua loe

²²Tti besin ka Jesús-ni lhe'esi Betsaida, ka benne ge niha nna bisin tteba lenke ttu benne lo xua ata du Jesús-ni, nianna unnaba ditibake lenie kini kane ka iyya lo benneha. ²³Lee nna bedaxxu ttebe ná benne lo xuaha nna uleabie benneha ro'o yiesiha. Nianna tti bettuttu xxenie kini utabie ka iyya lo benneha lhe uxxua nábie ikie lhe, nianna tti unnaba tise benneha, ree:

—¿Si bi gwa chi relenlu ttuxka'a to?

²⁴Benneha nna belannie nna ree:

—Chiba reláti ka benne, ttaka rula'abati ke ttiba ttu yaga ridá.

²⁵Nianna tti bedegan Jesús-ni ka iyya lo benneha attu libe.

La'anialiba nna chi beyaka ka iyya loeha nna belá tsenie iyá tte. ²⁶Nianna tti bedhelha Jesús-ni benneha deyye lisie nna ree bie:

—Abittu sata'alu lhe'esi-ni [lhe abittugaba kixxi'enlu ka benne se'e lhe'esi-ni lhe].

Pedro-ni rabie Jesús-ni: “Lu ankalu Cristu”

(Mt. 16:13-20; Lc. 9:18-21)

²⁷Delola nna bederia Jesús-ni dia lenie ka benne rudhetinieha, diake daka ta se'e ka yiesi to se'e daka Cesarea ge Filipino. Tti yu'uke nedaha nna unnaba tise, ree ke:

—¿Nú ra ka benne deki ankaa?

²⁸Ka benneha nna bekabike, ráke:

—Ttu chupa ka benne ráke deki lu ankalu Juan benne begadi indaha nna attu a chupake nna redenáke deki lu ankalu Elías, nna adíke nna ráke: “Ttu ka benne uka profeta ge Tata Do Yebáha-ba nuná.”

²⁹Nianna ra Jesús-ni ke:

—Lebi'i nna, ¿núla rale deki ankaa?

Pedro-ni nna bekabina rana:

—Lu ankalu Cristu benne chi ga'anani Tata Do Yebáha idhelhe.

³⁰Jesús-ni nna bodha'an tsitsie, ree ke:

—Anuttu nu gale deki neti ankaa Cristu.

Jesús-ni rigixxi'abie deki teeki uttikane

(Mt. 16:21-28; Lc. 9:22-27)

³¹Nianna tti udulo Jesús-ni rabie ke:

—Neti benne daya yebáha teeki tate xxattaa uyúá elha disa. Ka benneola geri'iha lhe ka nu loni ge ka bixxudiha lhe, anágaba ka nu rule'ekinna ka benne nu ra lo bia bennabi bodha'an Moisés-ni lhe, ka nuha ku'u ni'akani neti lhe uttikana neti lhe. Ttaka iki de chi beyonna ubisa uttiaha, la'ania nna eyaka benbaa attu libe.

³²Lhixxa rába utixxi'e nuha. Laxkala Pedro-ni uxine attu ta subi nna utisane.

³³Ttaka lee nna bodeki loe ata se'e adí ka benne rudhetinieha nna bedhaka dise Pedro-ni, ree na:

—¡Ubi'etta kwe'a xa nu xxegwi! Kumu lu nu anka ge ka benne se'e yiesi lo yu-niba do ikilu; labí do ikilu nu anka ge Tata Do Yebáha.

³⁴Nianna tti uxie iyába ka benne se'e niha lhe ka benne rudhetinieha nna ree ke:

—Ganna nuxa ttúle raka lele etenalhale neti, teeki eria iki eria lele, meskila bixa satele nna gwaludaxxu kurusi gele nna gwaltá gwetenalha neti. ³⁵Kumu ttu benne ganna abittuba raka lebie bixa satebie de etenalhe neti, benneha nnittilee, delába labí aka ben benneha arlo Tata Do Yebáha. Ttaka benne eria iki eria lebie meskila bixa satebie delo ni'a kia lhe delo ni'a ge ka tisa ge Tata Do Yebáha lhe, benneha gwalálee. ³⁶Kumu, labí ixú nuha ganna ttixka ttu benne dhaabie uin gebie iyá nu se'e yiesi lo yu-ni, ttaka arlo Tata Do Yebáha nna tsia nnittilee. ³⁷Nigaba labí aka geri'i go'ori'i elha nabani geri'i, kini anáchu aka benri'i ttu dia lii arlo Tata Do Yebáha. ³⁸Kumu ganna ttu benne ettunie kia lhe ettunie ge ka tisa kia-ni arlo ka nu chi ruin satsa se'e nnanna, lhe chi rudhá ikikani Tata Do Yebáha, anágaba neti benne daya yebáha ettugabati gekani ganna chi dedáya lhe'e xiani ge Tata kiahha len ka anjeli geeha.

9 ¹Rágaba Jesús-ni ke:

—Netiru ria: ttu chupale se'ele nii nnanna labí chi uttile axtaliba ganna chi bilenle isia Tata Do Yebáha innabie lhe ra tsitsi lebie lhe.

Jesús-ni tti due iki i'yaha besea lobie

(Mt. 17:1-13; Lc. 9:28-36)

²Iki de chi ute xxupa ubisaha nna tti ugwapi Jesús-ni iki ttu i'lya xeni do niha, chebie sun Pedro-niba lhe Jacobo-ni

lhe Juan-ni lhe. Niha besea lobie arlokani. ³Ka xoeha raka lhalhabakana lhe sitsi túba^h beyakakana lhe. Ni ttú benne do yiesi lo yu-ni dhaabie otsitsie ttu lari atti beyaka ka xo Jesús-ni la'ania. ⁴Lengwa chi bela'akinna uka xxe Elías-ni lhe Moisés-ni lhe, se'eke gwenne len Jesús-ni. ⁵Pedro-ni nna rana Jesús-ni:

—Maestru, ¡gwen tte uka se'etu nii! Usiatu tsunna ka yo'o lhaga gele: ttu gelu nna ttu ge Moisés-ni nna attu ge Elías-ni nna.

⁶Aníha-ba rana kumu de labí yuna bixa innána de si rasilakinna. ⁷Nianna tti bebe tteba ttu bea ata se'ekeha. Lhe'e beaha nna biyien tsi'i ttu benne unnebie, ree:

—Benne-ni anke Xi'inia lhe rakati gebie lhe. Ge benne-ni gwaludo nagale.

⁸Ttiruba nna ttu nnelaba benitti loo ka benneha, laxkala atti bodeki lokani belannikana abi'iba kwe'ekani nna nurua ka benneha bilákinna, a sunruba Jesús-ni du niha.

⁹Tti deyyake reyadike lati i'yaha nna ra Jesús-ni kana:

—Nuttu nu kixxi'enle ge nu bilenle-ni axtaliba ganna neti benne daya yebáha chi beyaka bania attu libe lagwi ge ka benne chi uttiha, la'anialiba nna chi dina kixxi'ale.

¹⁰Lake nna labí utixxi'ake, gwa ulu'uba leke nuha. Sun raba luesike: “¿Bíla dianie tti ree deki eyaka benbe attu libe?”

¹¹Nianna tti unnaba tisake Jesús-ni, ráke bie:

—¿Beakala ka nu rule'ekinna ka benne nu ra lo bia bennabi bodha'an Moisés-ni nna rákana deki Elías-ni teeki esie lade'a tte, niala nna tti isia Cristuha?

¹²Jesús-ni nna bekabie, ree kana:

—Gwalí galá deki Elías-ni esie lade'a tte ki ose'e tsebie iyá nu se'e. Ttaka ganna aníha aka nna, ¿beakala ra lo ka yetsi ge Tata Do Yebáha deki neti benne daya yebáha teeki sate xxattaa lhe ku'u ni'akani neti lhe? ¹³Ttaka neti ria, Elías-ni chiba bita benneha nna bedhakabakane attiba ukaba lekani, benbakana attiba chi ga'anna lo ka yetsi ge Tata Do Yebáha satebie.

^h 9:3 Lo yetsi-ni ata dia ra: “sitsi túba beyakakana lhe”, lo attu yetsi nna bodienke rake: “sitsi túba beyakakana attiba begi”.

Jesús-ni beyonie ttu nu kwiti yu'u ttu espíritu xwegwi latini
(Mt. 17:14-21; Lc. 9:37-43)

¹⁴Tti besin Jesús-ni lenie a tsunna ka benneha ata se'e adíru ka benne rudhetinieha, nianna gwaxxakake ixé juisiru ka benne chi tupake abi'iba kwe'e ka benneha. Niha-gaba se'e ka nu rule'ekinna ka benne nu ra lo bia bennabi bodha'an Moisés-ni. Ka nuha ridaka lenkana ka benne rudhetinieha.

¹⁵Ka benne se'e niha nna tti chi bilákanie dedá Jesús-ni nna iyábake bebanakanie, nianna biresu ttebake gwatsáke bie ki gwagweke bie padiuxi. ¹⁶Jesús-ni nna unnaba tise ka benne rudhetinieha, ree ke:

—¿Bíunna ridaka lenle ka nuná?

¹⁷Ttu benne sela lhe'e ka benne tupa niha nna bekabie ree:
—Xa tata maestru, laa chea xi'in biyúa-ni len kwinalu.

Yu'u ttu espíritu xwegwi latibi nna bodha'anna bi biría, nuní runi ki bittu raka innebi. ¹⁸Gaxaba dubi rettina gebi nna tti rurixxi lona bi ribeana kuchina ro'obi, lhe raka rriba lo layabi. Nianna tti rodá yaga ttebana latibi. Chi unnabaa len ka benne rudhetinlu-ni kini ebeake espíritu xwegwi-ni latibi, ttaka labí udaake.

¹⁹Jesús-ni nna ree ka benneha:

—¡Aalexá nu a ría leni! ¿Nukalila sa dhua len lebi'i?

¿Nukalila sa utto uchíaya ge nu ruinle? Daka aní gwataxxí nu kwiti-na.

²⁰Nianna tti gwaxxíke nu kwitiha, ttaka tti bilani espíritu yu'u lati nu kwitiha Jesús-ni, nianna bexxidi ttebana nu kwitiha, nna betesina na lo yu, lhe ribeana kuchina ro'oni lhe.

²¹Jesús-ni nna unnaba tise tata ge nu kwitiha, ree benneha:

—¿Si isá chi ridakabi nuní?

Benneha nna bekabie ree:

—Attiliba ankabi nutoha xa. ²²Ixe lidú chi bedelhana bi lo gi lhe bedelhana bi lhe'e inda lhe, ruinna uttina bi. Laxkala ganna gwaka gelu uinlu ttu bixa, gwatuachi lelu ri'itu lhe betechi nálu len ri'itu.

²³Jesús-ni nna bekabie ge benneha, ree:

—¿Gasina nuha nna innálu: “Ganna gwaka gelu”? Neti ría, nu ría leniha gwakaba iyába nu innabana.

²⁴Tata ge nu kwitiha nna unne ttebe idisa, ree:

—¡Gwa ria galá lasia! ¡Rinnabaa len kwinalu, akachi lenlu neti kini tsia chiettiru lasia!

²⁵Tti bilani Jesús-ni adíla chi rituparu ka benne, nianna bedhaka dise espíritu satsaha, ree nuha:

—¡Espíritu kwechu lhe biría lhe, neti rulisaa lu! ¡Beria lati nu kwiti-ni nna bitturu eteta'alu latini!

²⁶Espíritu satsaha nna ribesi'abana, nianna tti bodoxidi xxattana lati nu kwitiha attu libe, niala nna tti beriana. Nu kwitiha nna ttiba ttu nu yatti beya'anna, laxkala ixeba ka benne ráke deki uttibana. ²⁷Ttaka Jesús-ni nna bedaxxue ná nu kwitiha nna bechidhe na. Nu kwitiha nna beyadha ttebana bedúna.

²⁸Iki de nuha nna uta'a Jesús-ni lhe'e ttu yo'o. Tti chi due niha sun lenbe ka benne rudhetinieha, nianna tti unnaba tisa ka benneha, ráke bie:

—¿Beakala ri'itu nna a udaatu ebeatu espíritu satsaha?

²⁹Lee nna bekabie, ree ke:

—Luesi espíritu xxegwi-na labí kwenta eria nuná, ganna abíba innabari'i len Tata Do Yebáha [lhe ganna abíba utte ubina lhe'eri'i lhe].

Jesús-ni redegixxi'abie attu libe deki teeki uttikane

(Mt. 17:22-23; Lc. 9:43-45)

³⁰Bedábake ata se'ekeha nna beteke daka Galilea-ni, ttaka Jesús-ni nna labí raka lebie una ka benne deki rekike niha, ³¹kumu lee raka lebie ule'enie ka benne rudhetinieha, nianna ree ke:

—Neti benne daya yebáha utekana neti lasi ná ka nu uttikana neti, ttaka ganna chi beyonna ubisa uttiaha, la'ania nna eyaka benbaa attu libe.

³²Ttaka lake nna labí rite dákanie ge nu reeha nna rasibakanie innaba tisake bie.

Gasina uni ttu benne kini ake nu loni ge adíke

(Mt. 18:1-5; Lc. 9:46-48)

³³Tti chi besinke lhe'esi Capernaum, atti chi se'eke lhe'e yo'oha nna unnaba tisa Jesús-ni ka benne rudhetinieha, ree ke:

—¿Bí ge nuha ridaka len luesile tti deyu'uri'i nedaha?

³⁴Ttaka lake nna siiba ukake labí bekabike, kumu atti deyu'uke nedaha ridaka len luesike ge nuxake ankake nu ra xxeniru leni. ³⁵Nianna tti urebie nna uxie ka benne tsi'inu (12) rudhetinieha nna ree ke:

—Ganna nuxa ttúle raka lele akale nu loni delo iyále, benne ake nu loniha labí unie deki ra xxeni lebie, akalee nu ixúni iyále.

³⁶Nianna tti bedaxxue ttu nuto bedúe nuha lagwi geke nna tti ulhenie bi'iniha nna ree ke:

³⁷—Nuxaba benne de ria lebie neti, ganna ulabie ttu luesi nuto-ni, neti nuha rulabi benneha, nna benne ulabie netiha, laa netiga nuha rulabie, Tata kia benne udhelhe netiha, benneha nuha rulabie.

Benne abittu rig'u ni'e ri'i, gwa duba benneha len ri'i

(Lc. 9:49-50)

³⁸Juan-ni nna rana Jesús-ni:

—Maestru, chi bilentu ttu nubiyú reki naa rudettina lu tti rebeana ka espíritu xzegwi yu'u lati ka benne. Ttaka ri'itu nna chi besunatu kini abitturu uinna aná, kumu de labí rekina len ri'i.

³⁹Ttaka Jesús-ni nna ree kana:

—Bittu usunale ebeana ka espíritu-na. Kumu lanú ttu benne do rudettie neti tti runie ttu milagru, delo nna eyekie innebie kia. ⁴⁰Kumu benne abittu rig'u ni'e ri'i, benneha gwa dube len ri'i. ⁴¹Netiru ria, nuxaba benne ganna utebie kwadiba ttu xiga inda i'iyale de ankale benne ria lele neti, de nu unieha nna gugweba Tata Do Yebáha benneha nu tse ralhe dhie.

Jesús-ni rabie: “Gwaluyú gele ka ixú yiele uinle nu satsa”

(Mt. 18:6-9; Lc. 17:1-2)

⁴²Nuxaba benne ganna unie dhi yiebie ttu ka benne abittu ra xxeni leke; delába ttu ka benne ria leke neti, ganna benneha unie dhi yiebie ttu ka benneha ki uinke nu satsa, netiru ria, tserula taríane uxxigakana yienie ttu íyya ge mulinu nna udelhakane lhe'e indatooha. ⁴³Ganna nálu-na abittuba daa siina, nnelaba ruinlu ttu bixa nu satsa lenna, tsa ttela uchú nuná, kumu tserula taríana lu esinlu ata aka

benlu ttu dia liiha anka choku nálu, a laa kila esinlu len ixpa lha'a nálu ata uyúlu elha disa tsialu lo giha, delába gi nu abittuba reyola loniha nu satíaba rite loniha. ⁴⁴[Niha labí ratti ka bedua-na, lhe nigaba labí reyola lo giha lhe.] ⁴⁵Lhe anágaba ni'alu-na ganna abittuba ridú siina, nnelaba ruinlu ttu bixa nu satsa lenna, tsa ttela uchú nuná, kumu tserula saríana lu esinlu ata aka benlu ttu dia liiha anka choku ni'alu, a laa kila esinlu len ixpa lha'a ni'alu ata uyúlu elha disa nna iru'unalu tsialu lo giha, gi nu abittu reyola loniha, nu satíaba rite loniha. ⁴⁶[Niha labí ratti ka bedua-na lhe nigaba labí reyola lo giha lhe.] ⁴⁷Anágaba ganna iyya lolu-na rixuinlu na ki ruinlu ttu nu satsa, tsa ttela ulea nuná kumu tserula taríana lu esinlu ata rinnabia Tata Do Yebáha suna len ttu lha'aba iyya lolu, a laa kila esinlu leni ixpa lha'a lolu ata uyúlu elha disaha nna iru'unalu tsialu lo giha. ⁴⁸Niha labí ratti ka bedua-na lhe nigaba labí reyola lo giha lhe.

⁴⁹Kumu iyába ka benne, giha nuha uinna ki tsettike ixe ttiba ttu deti. ⁵⁰Deti-na tseba anka nuná, ttaka ganna deti-na itua ixe geni, la'ania nna, ¿gasina uinri'i kini eyona ixe? De nuha nna latsiru gwaluni. Elha ruin gele-na akana attiba ttu deti. Ttiba deti-na rugwena ixí ge ttu elho, aníha-ba lebi'i latsiru gwaltse'e, bittu ttilha len luesile.

Jesús-ni rabie: “Labí dika udhá iki luesi ka benne”

(Mt. 19:1-12; Lc. 16:18)

10 ¹Bedába Jesús-ni Capernaum nna diabie daka Judea, daka attu ladu ro'o yoo Jordán-ni. Nianna bedetupa tteba ixeru ka benne abi'iba kwe'ebie. Lee nna attiba chi labinie runie nna bededulo ttebe rodole'enie ka benneha ka tisa ge Tata Do Yebáha. ²Nianna tti ubiga ttu chupa ka fariseo. Sun tteba ruinkana kini ku'ukane prueba, de nuha nna unnaba tisakane, rákane:

—¿Si gwaka udhá iki ttu nubiyú nuila geni?

³Lee nna bekabie gekani ree:

—¿Bíla ra lo bia bennabi bodha'an Moisés-ni len lebi'i?

⁴Lakana nna bekabikana rákane:

—Lo bia bennabi bodha'an Moisés-ni, gwa rugwelhabana deki nubiyúha gwakaba ilhidhana ttu yetsi ata inná lo

nuha deki gwakaba ela'ana len nuila geniha. La'ania nna gwakaba udhá ikini nuilaha.ⁱ

⁵Jesús-ni nna ree kana:

—Moisés-ni bodha'an galábie aka aníha kumu de lebi'i labí rieninle. ⁶Ttaka Tata Do Yebáha, ttili ure yiesi lo yu-niha, nuila lhe nubiyúba lhe benie ka benne.^j ⁷De nuha nna teeki udhana nubiyúha ka tata nan geniha nna utsá náni len nuila geniha ⁸kini akakana ttisidiba ttúba benne. Laxkala labíru anakana chupa, sinuki ttúba benne chi akakana.^k ⁹Laxkala ka nu chi beketi Tata Do Yebáha, labí dika etsila ttu benne kana.

¹⁰Tti chi se'eke lhe'e yo'oha nna bedennaba tisa ka benne rudhetinieha bie attu libe ge nu chi unneeha. ¹¹Jesús-ni nna rabie ke:

—Ganna si ttu nubiyú udhá ikini nuila geniha nna edo lenna attu nu subi, la'ania nna satsaba nuha chi uin nubiyúha. ¹²Lhe anágaba nuilaha, ganna si udhá ikini nubiyú geniha nna edína attu nubiyú subi, satsagaba nuha chi uin nuilaha.

Jesús-ni rinnabe elha nabani ge ka binto

(Mt. 19:13-15; Lc. 18:15-17)

¹³Bisingaba ka benne len ka nuto kini uxxua ná Jesús-ni ikikabi, ttaka ka benne rudhetinieha nna rudhaka disalake ka benne cheke ka bi'iniha. ¹⁴Tti bilani Jesús-ni ruin ka benneha aníha, nianna bituxxunie nna ree ke:

—Gwalugwelha ka binto-na itakabi len neti nna abittu usunale. Kumu ka benne ruinke tti ruin ka binto-na, luesi ka benne-na ralhake akake ka benne innabia Tata Do Yebáha ke. ¹⁵Netiru ria, ganna ttu benne abíba unie tti runi ttu nuto ugwelhe innabia Tata Do Yebáha bie, benneha labí ake nu innabia Tata Do Yebáha.

¹⁶Nianna tti rudaxxue ka bintoa rilhenie kabi nna tti rixxua nee ikikabi, rinnabe elha nabani gekabi len Tata Do Yebáha.

Ttu nubiyú tee xxatta belhiu geni unne lenna Jesús-ni

(Mt. 19:16-30; Lc. 18:18-30)

¹⁷Chiba dha Jesús-ni tsie, ttiruba nna gwexunniba bisin ttu nubiyú nna bedú xibini arloe nna rane:

ⁱ 10:4 Deuteronomio 24:1

^j 10:6 Génesis 1:27

^k 10:8 Génesis 2:24

—Maestru, lu ankalu benne tse. Unáchu, ¿bíla anka nu unia kini satíaba aka bania arlo Tata Do Yebáha?

18 Jesús-ni nna bekabie geni, ree:

—¿Beaka ralu deki ankaa benne tse? Lanú ttu benne do anke benne tse, sunruba Tata Do Yebáha gwanke benne tse. **19** Lu chiba yulu nu boka'an Tata Do Yebáha uinri'i, tti ree:

Bittu akalu nu runi elhutti,^l
 lhe bittu dho lenlu nu abittu anka latselalu,^m
 lhe anágaba bittu lhanalu,ⁿ
 lhe bittu kwentaba usialu iki ka benne deki
 benke ttu bixa,^o
 lhe anágaba bittu kualu bixa tee ge ttu benne,
 lhe tsiagaba lelu ka tata nan gelu lhe.^p

20 Nubiyúha nna bekabina gee, rane:

—Maestru, ttili ankaa nu kwiti toha chi rudoa tisa ge iyá nu ralu-na.

21 Jesús-ni nna begíabie loni nna besi'inie na, nianna tti rabie na:

—A sun tte attu nu riyasa uinlu: beyya nna betto'o iyá nu tee gelu nna belhiu ge nuha nna begwe ka benne abittu geke tee. Ganna lu uinlu aníha, la'ania nna gwattaba elha tse gelu yebáha. La'anialigaba nna chinka utá betenalha neti.

22 Ttaka nubiyúha, tti biyieninna nu rabie naha, nianna si'iba bedúna leni deyyana kumu de tee xxatta geni.

23 Nianna tti belanni Jesús-ni abi'iba kwe'ebie nna ree ka benne rudhetinieha:

—Gáruba tsitsi anka ki isin ka nu tee gekinna akakana benne innabia Tata Do Yebáha.

24 Ka benne rudhetinieha nna bebanabakanie ge nu reeha. Jesús-ni nna redeabie ke:

—Xi'ini to, ka benne ruxxen leke ge nu tee geke, gáruba tsitsi anka ki isinke akake benne innabia Tata Do Yebáha.

^l 10:19 Éxodo 20:13


^m 10:19 Éxodo 20:14

ⁿ 10:19 Éxodo 20:15

^o 10:19 Éxodo 20:16

^p 10:19 Éxodo 20:12

25 Adírula satti ga'a ttu camellu lhe'e yieru do xan ttu yoxa attichula ga'a ka benne tee geke ki akake nu innabia Tata Do Yebáha.



(San Marcos 10:25)

26 Ka benne rudhetinieha nna adikala rebanakanie, nianna ra luesike:

—Ganna aníha nna, ¿nú tteba dhaana esin lenna Tata Do Yebáha?

27 Nianna tti belanni Jesús-ni loke nna ree ke:

—Len ka benne se'e yiesi lo yu-ni abittu galá aka, ttaka len Tata Do Yebáha iyába gwakaba.

28 Pedro-ni nna udulona rane:

—Biyúruga, ri'itu chiba bedhá ikitu iyába nu tee getu nna danalhatu lu.

29 Jesús-ni nna bekabie ree:

—Netiru ria, nuxaba benne ganna bedhá ikie yo'o geeha lhe ka betsieha lhe ka daneha lhe ka tata nan geeha lhe, anágaba ganna bedhá ikie nuila geeha lhe ka xi'inieha lhe ka lo yu geeha lhe de danalhe neti, lhe de ria lebie ka tisa ge Tata Do Yebáha lhe, **30** benneha, nnanna doe yiesi lo yu-ni gayua (100) libe-la edíe nu bedhá ikieha, delába edíe ka yo'o lhe ka betsie lhe ka dane, lhe anágaba edíe ka tata nan gee lhe edíe ka xi'inie lhe ka lo yu gee lhe, anágaba meskila sanookane urio lákane, ttaka nu si daa nna satíaba aka benbie arlo Tata Do Yebáha. **31** Ttaka ixé ka nu ra xxeni lekani nnanna, la'ania nna eyakakana ka nu abittu ra xxeni lekani, nna ka nu abittu ra xxeni lekani nnanna, ka nuha-la eyakakana ka nu ra xxeni lekani la'ania.

Jesús-ni beyonna libela rigixxi'abie deki teeki uttikane

(Mt. 20:17-19; Lc. 18:31-34)

³²Yu'ubake neda diake Jerusalén-ni nna daneruba Jesús-ni lo ka benne rudhetinieha. Ka benneha nna rebanabakanie lhe itú rasibakanie danalhake bie. Nianna tti bedeaxie sun ka benne tsi'inuha-ba (12) nna utixxi'anie ke nu satebie. ³³Nianna ree ke:

—Gwaluyúruuga, chiba diari'i isinri'i Jerusalén-ni. Neti benne daya yebáha nna chiba dabigana utekana neti lasi ná ka nu loni ge ka bixxudiha lhe lasi ná ka nu rule'ekinna ka benne nu ra lo bia bennabi bodha'an Moisés-ni lhe. Ka nuha nna urixxi ukinnibakana neti kini gattia, nianna tti uttekana neti lasi ná ka nu abittu anakakana nu Israel. ³⁴Ka nuha nna uxisikana kia lhe ukulhakana neti lhe, anágaba nna uttuttugaba xxenkani loa, nianna tti uttikana neti. Ttaka ganna chi eyonna ubisaha, la'ania nna eyaka benbaa attu libe.

Santiago-ni lhe Juan-ni lhe rinnabake ki tse'eke

gaxxa kwe'e Jesús-ni yebáha

(Mt. 20:20-28)

³⁵Jacobo-ni lhe Juan-ni lhe, lakana anakakana xi'in Zebedeo-ni. Ixpabakana ubigakana ata du Jesús-ni nna rákane:

—Maestru, raka letu uinlu nu innabatu.

³⁶Lee nna ree kana:

—¿Bí raka lele unia?

³⁷Lakana nna rákane:

—Ugwelhachilu ri'itu kwiatu gaxxa kwe'elu ganna chi esinlu yebáha ata innabialuha, ttutu dhotu daka ná benlu nna attutu nna dhotu daka ná yattilu.

³⁸Jesús-ni nna ree kana:

—Lebi'i labí yule nu rinnabale-na. ¿Si gwadaale uyúle luesi elha disa uyúa-ni lhe si gwadaale satele luesi nu satea-ni lhe?

³⁹Lakana nna rákane:

—Ila. Gwadaa galátu.

Lee nna ree kana:

—Gwalí galá, gwadaabale uyúle luesi elha disa uyúa-ni lhe satele nu satea-ni lhe, ⁴⁰ttaka nu rale deki ugwelhaa le kwiale, ttúle daka ná bania lhe attule daka ná yattia lhe, labí

neti ralhaa ugwelhaa le kwiale niha, sinuki nuná ankana ge ka benne chi ga'anani Tata Do Yebáha kwiake kwe'a niha.

⁴¹Tti biyienini a tsii ka benne rudhetinieha nu rinnaba Jacobo-ni lhe Juan-ni lhe, nianna bisa'akanie len ka benneha.

⁴²Jesús-ni nna beyaxie ke nna ree ke:

—Lebi'i gwa yúbale, ka nu rinnabia lhe'e ka yiesi dittu-na, rinnabiabakana ka benne gekani attiba rakaba lekani lhe anágaba ka nu ra xxeni lekani se'e lhe'e ka yiesi-na, nu rábakana raka. ⁴³Ttaka lebi'i labí aná dika udhaka luesile.

Lebi'i nu uinlale, ganna nuxa ttúle raka lele akale nu ra xxeni leni delo iyále, benne inná xxeni leha, benneha-la ake benne ixúni adíle, ⁴⁴lhe anágaba benne raka lebie ake nu loni gele, lalee ake attiba ttu nu to'o lo sina ixúe ute nábíe len iyá ttele.

⁴⁵Kumu anágaba neti benne daya yebáha laa dagaa yiesi lo yu-ni ki ixúti ka benne uinke nu innía, sinuki dalaa kini ixúa ute náya lenke lhe daya kini gattia kixaa ge ka tulha ruin ka benne, ki odiláya ixeke.

Bartimeo-ni bedhali Jesús-ni ka iyya loni

(Mt. 20:29-34; Lc. 18:35-43)

⁴⁶Bisinba Jesús-ni lenie ka benne rudhetinieha lhe ixe juisiru ka benne lhe'esi Jericó. Tti chi deyyake eriake lhe'esiha, ro'o neda deyyakeha re ttu nubiyú a raka ilenna, rinnabana belhiu. Nubiyúha lána Bartimeo. Bartimeo-ni ankana xi'in ttu benne tee lábíe Timeo. ⁴⁷Tti ute den Bartimeo-ni deki Jesús ge Nazaret-niba nuha utee niha, nianna tti unnena idisa, rana:

—¡Jesús benne datia David, gwtuachi lelu neti!

⁴⁸Nianna ixeba ka benne bedhaka disake nubiyúha kini eyaka siina, ttaka lana nna adíla idisa uresi'ana, rana:

—¡Benne datia David, gwtuachi lelu neti!

⁴⁹Nianna tti uleda Jesús-ni nna udhelhe kini gwalisake na. Ka benneha nna gwaxxíke benne lo xuaha nna ráke bie:

—Tsitsi uleki lelu nna udú lii. Chi raxie lu.

⁵⁰Benneha nna bedelha bixxie lari nukueha nna gintsaba udú liie, nianna tti die ata du Jesús-ni. ⁵¹Jesús-ni nna unnaba tise benneha, ree bie:

—¿Bí raka lelu udhaka lu?

Benne xua loeha nna ree:

—Maestru, raka lasia eyali ka iyya loa-ni.

⁵²Lee nna ree benneha:

—Chinka beyya. De ugía lelu deki gweyakabalu, de nuha nna chiba beyakalu.

Looraha tteba beyali ka iyya lo benneha, nianna dia ttebe danalhe Jesús-ni.

Jesús-ni uta'abie lhe'esi Jerusalén-ni

(Mt. 21:1-11; Lc. 19:28-40; Jn. 12:12-19)

11 ¹Tti chi isin ka Jesús-ni lhe'esi Jerusalén-ni, gaxxaba ata re lhe'esi Betfagé lhe Betania lhe, daka ata do i'iya ata daa ka ya olivuha, nianna tti udhelha Jesús-ni chupa ka benne rudhetinieha, ²ree ke:

—Gwaltsia lhe'e yiesi to re arlori'i-ni. Ganna chi uta'ale lhe'e yiesi-na nna saxxaka ttebale nalha ttu burru to, ttu nu lanú nu chi udona kwe'eni. Gwalidhasi yienni nna gwaltá lenna. ³Ganna nuxa innaba tisana le, gana le: “¿Beaka ridhasile yien burru to-na?” Aní gwaligá na: “Jesús benne anke Xxanari'iha-ba riyasanie nuní, delola nna gwetedha'an tte gee na.”

⁴Nianna dia ttebake nna gwaxxakabake burru toha, nalhana ro'o nedaha, gaxxaba ro'o ttu yo'o. Nianna tti udhasike yienni.

⁵Ttu chupa ka nu se'e niha nna unnaba tisakana, rákana:

—¿Bíunna ruinle? ¿Beaka ridhasile yien burru to-na?

⁶Ka benneha nna bekabibake atti tteba ra Jesús-ni ekabike.

Aníha uka nna gwa begwelhabakana ke decheke bia toha.

⁷Tti besin lenke burru toha ata du Jesús-ni, nianna utsilake ka xokeha kwe'e bia toha nna tti udoe kwe'eba. ⁸Ixegaba ka benne utsilake ka xokeha lo neda ata dia Jesús-ni ritebie nna adíke nna utitsake lo ka yaga daa niha nna utsilake lo nedaha.

⁹Ka benne daneruke arloeha lhe ka benne danalhake bieha lhe, ka benneha nna ribesi'abake ráke bie:

¡Xxeniba ra lelu!

¡Karubárulu! ¡Lu ankalu benne udhelha Tata Xisiha!

¹⁰¡Karubárulu! ¡Lu innabialu ttiba unnabia tata geri'i David-ni!

¡Xxeniba ra le Tata Do Yebáha!

¹¹Tti uta'a Jesús-ni lhe'esi Jerusalén-ni nna dia ttebe ata do yotuha nna bilánie abi'iba kwe'e yotuha iyá nu raka niha,

ttaka kumu chi galá diora nuha, de nuha nna bedá ttebe len ka benne tsi'inu rudhetinieha (12) deyyake daka Betania.

Jesús-ni benie kini ubisi ya higuha

(Mt. 21:18-19)

¹²Beyeki sáha, tti beriake lhe'esi Betania, ugwetti bituin Jesús-ni. ¹³Nianna tti bilánie du ttu ya higu axtaru nu reha gwa siaba lhaga geni. Lee nna dia ttebe ata du yagaha ganna gwa sia higu loni. Ttaka bi gwaxxake ni ttu higu lo nuha, sunruba lhaga geni sia, kumu labí higu chi rebia la'ania.

¹⁴Nianna tti ree yagaha:

—¡Debá nnanna niruba attu higu a kwiaru lolu, laxkala lanúru nu gona nu xixxi gelu!

Ka benne rudhetinieha nna biyienbakanie nu reeha.

Jesús-ni bochesue ka nu se'e gwetto'o lali'a yotuha

(Mt. 21:12-17; Lc. 19:45-48; Jn. 2:13-22)

¹⁵Tti bisinke lhe'esi Jerusalén-ni nna uta'a tteba Jesús-ni lali'a yotuha nna udulo ttebe bochesue iyá ka nu se'e gwetto'oha lhe ka nu yu'u ugo'oha lhe. Berixxi logabe ka mexa ge ka nu rotsea belhiha lhe ka xxila ge ka nu se'e



(Marcos 11:15-19)

gwetto'o ka bechaha lhe. ¹⁶Anágaba labíru begwelhe ka benne tteke lali'a yotuha nujake yua. ¹⁷Nianna rigixxi'anie ka benneha ree ke:

—¿Laaba ganna lo ka yetsi ge Tata Do Yebáha dia ra: “Yo'o kia-ni ixúe kini iyá xea ka benne se'e yiesi lo yu-ni ilhapike tisa len neti”?^q Ttaka lebi'i nna ttiba “belea ata yu'u ka ubanala” chi benle yotu-ni.^r

¹⁸Biyienbakin ka nu loni ge ka bixxudiha lhe ka nu rule'ekinna ka benne nu ra lo bia bennabi bodha'an Moisés-ni nu ra Jesús-ni, nianna tti begila lekani kini gaxasina uinkana uttikane, kumu rasibakinna gebie kumu de iyába ka benne rebanabakanie ge nu rule'enie keha. ¹⁹Tti chi ulha sá nna beriaba Jesús-ni Jerusalén-ni lenie ka benne rudhethinieha deyyake.

**Ganna si tuttíruga tsia tsitsi leri'i ge Tata Do Yebáha,
la'ania nna gwadíbari'i nu innabari'i**
(Mt. 21:19-22)

²⁰Beyeki dilaha nna dia Jesús-ni lenie ka benne rudhethinieha nna uteke gaxxaba ata du ya higuha. Nianna bilákanie yagaha, chi ubisi nuha itupa lhu-ni.

²¹Nianna tti gwadú le Pedro-ni nna rana Jesús-ni:

—Maestru, belanniruga ya higu utisaluha, chiba ubisina.

²²Jesús-ni nna bekabie, ree kana:

—Gwaluxxen tsitsi lele ge Tata Do Yebáha. ²³Netiru ria, nuxaba benne ganna ttixka gabie i'iya do naa: “Ubi'etta ata dolu-na nna ugía gwaxxudi lhe'e indatoo-na”, benne inná aníha abittu udú chupana lebie tti innee aníha, sinuki tuttíruga tsia tsitsi lebie deki gwakaba nu reeha, la'ania nna gwakaba nu rinnabeha. ²⁴Laxkala de nuha nna ria le, iyába nu innabale len Tata Do Yebáha tti rinnele lenie, gwaltsia lele deki chiba uxíle nu unnabaleha, la'ania nna gwadíbale nuha, ²⁵lhe anágaba tti se'ele rilhapile tisa len Tata Do Yebáha, gwalidhí elha xen lasi ge ttu benne ganna ritilha lenlee, kini anágaba nna Tata gele benne do yebáha gwadígabe elha xen lasi ge ka tulha ruinle. ²⁶[Kumu ganna lebi'i abíba dhile elha

^q 11:17 Isaías 56:7

^r 11:17 Jeremías 7:11

xen lasi ge ttu benne, anágaba Tata gele do yebáha, labígaba dhie elha xen lasi ge ka tulha ruinle.]

Jesús-ni rinnaba tisakane nú begwene lo neda

kini runie ka nu runieha

(Mt. 21:23-27; Lc. 20:1-8)

²⁷Tti bedesinke Jerusalén-ni nna laka reki Jesús-ni ata do yotuha, nianna tti ubiga ka nu loni ge ka bixxudiha lhe ka nu rule'ekinna ka benne nu ra lo bia bennabi bodha'an Moisés-ni lhe, anágaba ubigagaba ka benneola ge ka nu Israel-ni,

²⁸nianna unnaba tisakana, rákane:

—¿Bí lo neda nuná rapalu kini ruinlu ka nu ruinlu-na?

¿Núla betena lo neda gelu kini ruinlu nuná?

²⁹Jesús-ni nna bekabie, ree kana:

—Anágaba neti innaba tisagabaa le ttu bixa. Ganna ekabile ge nu innaba tisa le-ni, la'ania nna neti gwagixxi'agabania le nú betena lo neda len neti kini runia ka nu runia-ni.

³⁰Gwalinná sanga, ¿nú iki biria ki begadi Juan-ni ka benne inda? ¿Si iki Tata Do Yebáha ak? ¿Iki ka benne se'e yiesi lo yu-ni ak?

³¹Lakana nna ra luesikani:

—Ganna gari'i na: “Tata Do Yebáha-ba udhelhe benneha”, la'ania nna innána: “¿Beaka laa a ugía lele ge benneha ganna?” ³²Bittugaba aka geri'i gari'i na: “Ka benneba udhelhake benneha.”

Aníha rákana kumu rasibakinna ge ka benne kumu iyábake ria leke deki Juan-ni gwalíga uka benneha profeta ge Tata Do Yebáha.

³³Aníha uka nna bekabikana ge Jesús-ni, rákane:

—Labí yutu nuxa udhelhana benneha.

Lee nna bekabie gekani, ree:

—Anágaba neti bittugaba kixxi'ania le nú rutena lo neda len neti kini runia ka nu runia-ni.

Jesús-ni rigixxi'abie ge ka nu ruin satsa riben lo yuha

(Mt. 21:33-46; Lc. 20:9-19)

12 ¹Nianna tti udulo Jesús-ni utixxi'anie ka nu loni ge ka nu Israel-ni ttu tisa. Aníha benie kini utte dákana bí diani nu raka lebie kixxi'anie kana. Nianna tti ree:

—Ttu benne biyú beyade ka ya uva lo yu geeha, nianna tti bedheabie abi'iba ro'o yuha lhe ulekíe ttu xieru ata idí uvaha. Anágaba nna bengabe ttu yo'o ttu nu yadha kini dho benne ulatsie ki anuttu nu salhidana uvaha. Nianna tti bete ganne yuha len ka nu kwenkana nuha, lee nna biriabie die idittu. ²Atti chi bisia sá exú uvaha nna udhelhe ttu ka benne riben lo sina geeha kini tsie ata se'e ka nu riben lo yuha ki utekana nu ralhe dhie ge lo yuha. ³Ttaka ka nu riben lo yu geeha bedaxxulakana benne udhelheha nna uyalakane. Nianna suna anába anke bedhelhakane. ⁴Nianna tti bededhelhe attu benne riben lo sina geeha, ttaka lakana nna bodosíalakana benneha íyya nna ulha'akana ikie lhe besiala lekanie lhe. ⁵Nianna tti bededhelhe attue, ttaka benneha bettilakane. Iki de nuha nna udhelharugabe ixeeruke, ttaka ttu chupa ka benneha uyakana ke nna attu chupake nna bettibakana ke. ⁶Nianna a sunruba xi'in biyúeha bexxa, benne rakanie geeha. Debá benneha udhelhe kumu rakanie: “Xi'inia-niligaba nna gweyya lekanie.” ⁷Ttaka ka nu riben lo yu geeha, tti bilákinna xi'in biyúeha, nianna ra luesikani: “Lana nuní eya'anna lo yu-ni. Uttiri'i na kini eya'anri'i len yu-ni.” ⁸Nianna tti bedaxxukana benne kwitiha nna bettikane nna tti bedelhakane ro'o yu ata daa ka ya uvaha.

⁹Nianna tti ra Jesús-ni kana:

—¿Bí rakinle uin xxana ka ya uvaha ganna? ¿Laaba ganna tsie nna uttie ka nu riben lo yu geeha, nianna tti odotebie yuha len ka nu subi? ¹⁰¿Si lagwa chi belabale lo ka yetsi ge Tata Do Yebáha ata dia ra:

Íyya nu ulu'u ni'a ka nu rukuakana yo'oha,
íyyaha-la nuha chi bisinna beyakana nu rixúru;

¹¹Tata Xisiha-ba benie kini uka aní,
nna rebanabinri'i rilenri'i nu benie?^s

¹²Ka nu loni ge ka nu Israel-ni, kumu ute dábakinna deki labakana nuha betani Jesús-ni nu unneeha, de nuha nna ruinkana doelha udaxxukane, ttaka de rasikinna ge ka benne, de nuha nna labí beyaxakina udaxxukane. Laxkala nna du bixxibe deyyakana.

^s 12:10-11 Salmo 118:22-23

**¿Si teeki kixa ka benne belhiu len César nu rinnabia ge
Roma-ni?**

(Mt. 22:15-22; Lc. 20:20-26)

¹³Nianna tti udhelhakana ttu chupa ka fariseo lhe ttu chupa ka nu tákana Herodes-ni lhe, kini tsia ka nuha ata du Jesús-ni nna innaba tisakane ttu bixa kini ibixxinie bixa innábie kini aníha-chu nna tee ro'okani ukinnikane. ¹⁴Ka nuha nna bisinkana, rákane:

—Maestru, gwa yúbatu deki lu rinnebalu nu ankaba gwalí, labí retabinlu ge nu inná ka benne, kumu labí rulannilu ttixa anka ka benne. Lu rule'ebinlu ka benne neda ge Tata Do Yebáha attiba ankaba geni. Gwelha unáchu, ¿si gwa ga'anaba kixari'i belhiu nu daa lori'i kixari'i len César nu rinnabia xeniha, o abittuba ak? ¿Si gwagixari'i belhuha, o abittuba ak?

¹⁵Ttaka lee nna ute da ttebanie nu rulha lekaniha, nianna tti ree kana:

—¿Beaka ruinle ki ichekua ki ibixxiti bixa inná? Nii gwalute ttu belhiu ki ugíaya loni.

¹⁶Nianna tti begwekane belhuha. Labie nna ree kana:

—¿Nú lo nuní du lo belhiu-ni lhe nú lá nuní dia xani'a nuní lhe?

Lakana nna bekabikana, rákana:

—Lá César nu rinnabia xeniha-ba nuní dia lo nuní.

¹⁷Nianna bekabi Jesús-ni, ree kana:

—Ganna aníha nna gwalugweba César-ni nu anka geni. Anágaba Tata Do Yebáha nna gwalugwegabe nu anka gebie.

Nianna bebanabakinna gebie.

**Ka saduceo-ni rinnaba tisakana Jesús-ni
ganna gwalí reyaka ben ka benne chi uttiha**

(Mt. 22:23-33; Lc. 20:27-40)

¹⁸Nianna bisin ttu chupa ka saduceo ata du Jesús-ni. Ka nuha rákana deki labí reyaka ben ka benne chi uttiha. Nianna tti unnaba tisakane, rákane:

¹⁹—Maestru, Moisés-ni bodha'ane lo yetsi lenri'i, ree: “Ganna ttu nubiyú chi betsá nání, nianna gattina nna anúba xi'inni aka len nuila geniha, la'ania nna teeki edí betsiniha nuila bidabiha kini anáchu nna ka xi'ini aka len nuilaha

nna eyakakana ttisidiba xi'in benne chi uttiha.” ²⁰Ttu lidú use'e gasi betsi ka nubiyú. Nu xxeniha betsába nání, ttaka uttibana nna lanú xi'inni uka len nuila geniha. ²¹Nianna bedí nu berupaha nuila bidabiha, ttaka bedeattigaba nuha nna anúgaba xi'inkani bedeaka. Aníha-gaba gwadite nu beyonnaha. ²²Aníha-ba gwate iyába gasi betsikani, lanú xi'inkani uka len nuilaha. Iki de nuha nna uttigaba nuilaha. ²³Nnanna nna unáchu, ganna chi bisia sá eyaka ben ka benne chi uttiha, ¿núla nuila gekani eyaka nuilaha, ki iyába gasi betsikani udo lenkana nuha?

²⁴Jesús-ni nna bekabie, ree kana:

—Lebi'i rinittibale nu gweala rale, kumu de labí yule nu ra lo ka yetsi ge Tata Do Yebáha lhe labí yule tsitsiba ra lebie lhe. ²⁵Kumu ganna chi bisia sá eyaka ben ka benne chi uttiha, la'ania nna nuila lhe nubiyú lhe labíru dina otsá ná ka benneha, nigaba uketike ka xi'inkeha kumu eyakabake attiba ka anjeli se'e yebáha. ²⁶Nu rari'i ge ka benne chi uttiha ganna gweyaka benke, nnanna kixxi'ania le: Lebi'i, ¿si lagwa chi belabale lo yetsi ben Moisés-ni ata rigixxi'e ge xxiti rite loniha? Lhe'e xxitiha nuha unne Tata Do Yebáha, ree Moisés-ni: “Neti ankaa Diosi ge Abraham-ni lhe ge Isaac-ni lhe ge Jacob-ni lhe.”^t ²⁷Laxkala Tata Do Yebáha labí anke Diosi ge ka benne chi uttiha, lee anke Diosi ge ka benne anka bani. De nuha nna lebi'i labí yule ge nu rale-na.

**De lo iyá ka tisa bodha'an Tata Do Yebáha,
¿nú ka nuha rakaru doelha udori'i tisa geni?**

(Mt. 22:34-40)

²⁸Ttu ka nu rule'enna ka benne nu ra lo bia bennabi bodha'an Moisés-ni tti biyieninna du Jesús-ni ridaka lanie ka saduceo-ni lhe biyieninna deki gwa bekabi tseba Jesús-ni ge ka nuha, nianna tti ubigana nna unnaba tisane, rana:

—Delo iyá ka tisa bodha'an Tata Do Yebáha uinri'i, ¿nú ka nuha dakaru?

²⁹Jesús-ni nna bekabie geni, ree na:

—Dakaru tisa nu ra: “Lebi'i ka benne datiale Israel, gwaludo nagale. Tata Do Yebáha, ttúba benneha anke

^t 12:26 Éxodo 3:6

Xxanari'i, lanúru nu attu do ³⁰lhe anágaba ra: akinle ge Tata Do Yebaa benne anka Xxanaleha itú iki itú lele.”^u ³¹Tisa nu berupa bodha'an Tata Do Yebáha uinri'i, nuha nna rana: “Akinle ge attu benne atti tteba rakabin gele.”^v Labí attu tisa tee nu dakaru bodha'ane uinri'i tti nu ra ka tisa-ni.

³²Nu rule'enna ka benne nu ra lo bia bennabiha nna rana:

—Tseba bekabilu xa maestru. Gwalíbinlu ralu deki ttúba Tata Do Yebáha do, lanú nu attu do, ³³lhe anágaba nu ralu akinle ge Tata Do Yebáha itú iki itú lele lhe akagabinle ge ka benne atti tteba rakabin gele. Ka tisa-nila dakaru attichula ka úna lhe ka nimala ruttiri'i, ruteri'i len Tata Do Yebáha.

³⁴Jesús-ni nna tti ute danie deki tseba bekabi nu rule'e lo bia bennabiha, nianna tti ree na:

—Lu chi tteba duna akalu benne innabia Tata Do Yebáha lu.

Debá la'ania nna lanúru nu beyaxinna innaba tisana Jesús-ni ge attu bixa.

David-ni uke xutto Cristuha

(Mt. 22:41-46; Lc. 20:41-44)

³⁵Laka du Jesús-ni lali'a yotuha rule'enie ka benne ka tisa ge Tata Do Yebáha, nianna ree ke:

—¿Galasina nna ka nu rule'ekinna ka benne nu ra lo bia bennabi bodha'an Moisés-ni nna rálakana deki David-ni ukana xutto Cristuha? ³⁶Ki kwinaba David-ni tti yu'u Espíritu ge Tata Do Yebáha latini nna Espírituha beni kini unnena, rana:

Tata Do Yebáha ree Cristu benne runie neti mandaduha:

“Utá udo daka ná ben kia.

Niiba dholu axtaliba ganna chi bese'a ka nu abittu raka uyúkana lu, kini ulealu ikikani.”^w

³⁷Ki ganna kwinaba David-ni utixxana lá Cristuha benne runie na mandadu, ¿galasina nna uka David-ni xutto Cristuha ganna?

Ixeru ka benne rudo nagake ge Jesús-ni nna ru'uba leke ge nu rigixxi'eha.

^u 12:29-30 Deuteronomio 6:4-5

^v 12:31 Levítico 19:18

^w 12:36 Salmo 110:1

**Jesús-ni rinnebie ge ka fariseo-ni lhe ge ka nu rule'ekana
nu ra lo bia bennabiha lhe**

(Mt. 23:1-36; Lc. 11:37-54; 20:45-47)

38 Jesús-ni nna ree ka benne tti due rule'enie keha:

—Gwaluyú gele len ka nu rule'ekinna le nu ra lo bia bennabi bodha'an Moisés-ni, kumu ka nuná ru'u lekani rekikana len ka xalho ttuni lhe ru'u lekani latsiru ga ka benne kana padiuxi atti reti'ake kana lo ka neda-na, **39**lhe anágaba ru'ugaba lekani kwiakana lo ka xxila tseru se'e lhe'e ka yo'o ata rudhetiri'i ka tisa ge Tata Do Yebáha, lhe ru'ugaba lekani kwiakana ata anka tseru tti riakana go yetta. **40**Anágaba nna riguagabakana ka yo'o ge ka nuila bidabi-na, nna ukadiba rise'ekana isá rilhapikana tisa len Tata Do Yebáha kini rudheakana lo nu ruinkanaha. Ka nuná adírula elha disa tsitsi uyúkana la'ania.

Benne nuila bidabiha betebe iyá belhiu geeha

(Lc. 21:1-4)

41 Jesús-ni doe ttu libe lali'a yotuha gaxxaba ata sia ka nu rigu'u ka benne úna lhe'ekani nna rulannie gasina rigu'ukana belhiu. Ixe ka nu tee gekani risinkana rigu'ukana ixeni belhiu lhe'e ka nuha. **42**Ttaka ttu benne nuila bidabi abittu gebie tee, bisine nna ulu'e chupa ka belhiu to, ka nu lattiruba lidhakakani tee. **43**Jesús-ni nna uxie ka benne rudhetinieha nna ree ke:

—Netiru ria, benne nuila bidabi-ni anke benne abittu gebie tee nna xxenirula daka belhiu ulu'e attichula nu chi ulu'u iyá ka nu chi ulu'u belhiu, **44**kumu ka nuná ulu'ubakana belhiu nu rexxaba gekani, ttaka benne nuila-ni anke benne abittu gebie tee nna ulu'ube iyába belhiu tee gebie nu dika ixúnie ki aka banie.

Jesús-ni rigixxi'abie deki isia sá tse'e looba yotuha

(Mt. 24:1-2; Lc. 21:5-6)

13 **1**Tti bedá Jesús-ni ro'o yotuha nna ttu ka benne rudhetinieha nna ree bie:

—¡Maestru, biyúruga, anílruba anka ka íyya kua-ni lhe anílruba anka ka yo'o-ni lhe!

²Jesús-ni nna bekabie geni, ree na:

—¿Si gwa rilenlu ka yo'o xeni sia nii? Ka nuní tse'e loobakana. Niruba ttu íyya gekani laa eya'anna iki luesini; iyábakana itampabakana.

Jesús-ni rigixxi'abie gasina aka atti lanila lhuxa yiesi lo yu-ni

(Mt. 24:3-35, 42-44; Lc. 21:7-36; 17:22-24)

³Tti do Jesús-ni iki i'íya ata daa ka ya olivuha daka ata yeki lo yotuha, la'ania nna sun labe unnaba tisa Pedro-ni lhe Jacobo-ni lhe Juan-ni lhe Andrés-ni lhe, rákane:

⁴—Utixxi'en ri'itu, ¿nuka aka nu ralu-na lhe bí aka kini unna liina deki chi dabiga aka nu ralu-na?

⁵Jesús-ni nna bekabie, ree kana:

—Gwaluyú gele bittu tsia lele ge ka nu ruin lekani, ⁶kumu ixe ka nu isia uinkana ttisidiba netiba nuha ankakana, nianna tti innákana: “Neti ankaa Cristu.” La'ania nna ixeba ka benne dhi yiekana.

⁷Atti unale deki chi yu'u ka yiesi ritilha len luesikani lhe daa tisa deki ruin ka yiesi itilha len luesikani lhe, bittu gasinle kumu teeki aka aníha. Ttaka labí chi bisia ura lhuxa yiesi lo yu-ni la'ania, ⁸kumu ka yiesi elha-na ebi'i noo luesikani ttihakana lhe ka nu rinnabia-na ebi'i noogaba luesikani, lhe anágaba gattibani yiesi lo yu-ni ixú lhe isiagaba ubina lhe. La'ania nna si dhuloruba ka benne uyúke elha disa.

⁹Lebi'i nna gwaluyúla gele, kumu teeki taga'akana le lo ka uxtisi lhe ukulhagabakana le lhe'e ka yo'o ata rudhetiri'i ka tisa ge Tata Do Yebáha lhe axtala arlo ka nu rinnabia xeni tatso dúkana le delo ni'a kia, kini aníha nna lebi'i kixxi'enle kana kia. ¹⁰Ttaka atti lanila lhuxa yiesi lo yu-ni, teeki chadhi ka tisa ge Tata Do Yebáha lhe'e iyába ka yiesi se'e itúba yiesi lo yu-ni. ¹¹Tti udaxxukana le nna saga'akana le arlo ka uxtisiha, abittu uchacha ikile bixa innále looraha. Suna gwalekabiba tisa ute Espíritu ge Tata Do Yebáha len lebi'i, kumu laa lebi'iga nuha innele, Espírituha-ba nuha inne. ¹²La'ania eyeki ka benne ebi'i noo luesike. Ka nu raka betsikaniha utekana ka betsikaniha lasi ná ka nu uttikana ka nuha, lhe aníha-gaba uin ka xxudiha len ka xi'inkaniha. Ka xi'inkaniha nna eyekikana ebi'i nookana ka xxudikaniha nna uinkana kini gatti ka benneha. ¹³Lebi'i nna iyába ka benne utía di lekani le delo ni'a

ge ria lele neti. Ttaka benne dhaabie dhu tsitsie lo neda kia axtaliba ganna chi uluxa iyá nu akaha, benneha gwalábe.

¹⁴'Ttaka lebi'i isia sá ganna chi ilenle aka ttu nu tuttíruuga satsa ata labí dina akana, delába ge nu satsa utixxi'a profeta Daniel-ni. (Ata rulabale ka tisa-ni, gwalutte da nu rákana.)

Ganna chi ilenle aka nu satsaha, la'ania nna ka nu se'e daka Judea-ni teeki uxunnikana tsapikana iki ka i'iya sia niha,

¹⁵nna nu dona iki yo'o geniha abittu eyadina, lhe nigaba eta'ana lhe'e yo'oha saleana ttu bixa, ¹⁶lhe nu dia lhe'exxiha bittu eyyana lhe'e yo'o geniha saxxína jabana geniha.

¹⁷ᵐGwalíchiru le ka benne nuila ata nuja xi'inke la'ania, lhe denke ka nuto rasi lhe! ¹⁸Gwalinnaba len Tata Do Yebáha ki abittu aka nuní tti raka idilhaha, ¹⁹kumu elha disa tsitsi nuha uyú ka benne lhe'e ka sáha, ttu elha disa nu labí chi uka itú uleki Tata Do Yebáha yiesi lo yu-ni, la'anialiba nna aka nuha

lhe nigaba labíru aka luesi elha disaha nu si daa lhe. ²⁰Kumu Tata Do Yebáha, ganna ttixka abíba odatsie ka sáha, la'ania nna niru ttú benne labí lhaabie, iyábake gattike. Ttaka lee

odatsie ka sáha kumu de rakanie ge ka benne chi bekwebie.

²¹'Ganna nuxa gana le la'ania: "Gwalulanniruga, ne benne anka Cristuha du nii", o si innána: "Gwalugíaruga, ne bie du naa", abittu tsia lele ge nu inná aníha. ²²Kumu isia ka nu labí gwalí anakakana Cristu lhe isia ka nu labí gwalí anakakana profeta ge Tata Do Yebáha nna uinkana ka milagru lhe uinkana ttu bixa nu dika ebanani ka benne geni. Aníha uinkana kini dhi yiekana ke. Gaxa axtala ka benne chi bekwe Tata Do Yebáha ki akake gebie, axtala ka benneha dhi yiekana ki tsia leke gekani. ²³Laxkala lebi'i gwaluyú gele. Nnannali chi rigixxi'ania le iyá nu aka la'ania.

²⁴'Iki de chi ute ka sá tti uyú ka benne elha disaha, la'ania nna echulha lo tatubisa-na nna nanto beo-na nna labíru ku'ubie xiani. ²⁵Ka beli sia gwetsáha nna iginnibakana lo yu lhe adíru ka nu ra xxeni lekani se'e gwetsáha igubigabakana. ²⁶La'ania nna neti benne daya yebáha, iláni ka benne neti dedáya yebáha lhe'e beaha ra tsitsi lasia lhe raka lhalhaba xiani kia lhe. ²⁷Nianna tti idhelhaa ka anjeli kiaha itú tte yiesi lo yu-ni, axtaba ata riluxa yebáha lhe axtaba ata riluxa yiesi lo yu-ni lhe. Idhelhaa ke kini tsiake ottupake ka benne chi bekwe Tata Do Yebáha.

²⁸Gwalutte dáruga ge ya higuha. Nuha ganna chi renettu ka lo nání lhe reria ka lhaga geni lhe, la'ania nna chi yule deki chiba dabigana eta'a iyya. ²⁹Anágaba lebi'i ganna chi ilenle aka nu chi ria-ni, la'ania nna chi yule deki chi tteba dabiga esiaya. ³⁰Netiru ria, atti isia sá aka iyá ka nuní, ka benne se'e nnanna labí chi uttike la'ania. ³¹Yebáha lhe yiesi lo yu-ni tse'e loobakana, ttaka ka tisa chi ria-ni teekiba aka nu ra ka benne-ni.

³²Ttaka la sá lhe la ura aka nuha, lanú nu yuna, ni ka anjeli ge Tata Do Yebáha yuke lhe nigaba neti benne ankaa Xi'inieha a yua, sunruba Tataha yue.

³³De nuha nna gwaltse'e tsitsi lhe gwaltse'e ubeda lhe [gwalinne len Tata Do Yebáha lhe] kumu lebi'i labí yule nukaxa aka nuha. ³⁴Gwaluni attiba beni ttu benne birie die idittu nna bedha'ane yo'o geeha len ka nu reni lo sina geeha. Ttu ttu ka nuha begwebie kana sina ralhakana uinkana, nna nu ridú ridhalina lhe rodheana ro'o yo'oha nna ree nuha: “Ulanni tsitsilu ro'o yo'o kia-ni kini anuttu nu ga'a.” ³⁵Laxkala lebi'i gwaltse'e ubeda kumu labí yule nukaxa esia xxana yo'oha, si esie chi dia ralha o esie riluela, o esie atti chi ribesi ka chinka-na lhe o si esie tti chi daa tsani lhe, ³⁶kini ni kina ttu nnelaba esie nna etexxake le te'adhile. ³⁷Nu xpeya le-ni, nunígaba upeya iyá ka benne: ¡Gwaltse'e tenná!

**Ka nu loni ge ka benne Israel-ni regila lekani
gaxasina udaxxukana Jesús-ni**

(Mt. 26:1-5; Lc. 22:1-2; Jn. 11:45-53)

14 ¹A chupa ubisaba riyasa isia laní Pascua tti ro ka benne Israel-ni yettaxtila nu abittu kua dii sela lhe'eni. Ka nu loni ge ka bixxudiha lhe ka nu rule'ekinna ka benne nu ra lo bia bennabi bodha'an Moisés-ni, ka nuha regila lekani bixa ibixxini Jesús-ni innee kini aníha-chu nna tee ro'okani udaxxukane nna uttikane. ²Ttaka lakana nna ra luesikani:

—Bittu uinri'i nuha tti raka laníha kini ka utsatsari'i ka benne.

Ttu nuila bedona seti nu rure ixixxi iki Jesús-ni

(Mt. 26:6-13; Jn. 12:1-8)

³Jesús-ni doe lhe'esi Betania lhe'e lisi Simón nu uka latini yiesu nu tee lání lepra. Tti doe go yettaha bisin ttu nuila

denna ttu re'e to ankana ge íyya ragalha. Íyya ragalhaha tee láni alabastro. Lhe'e re'e toha ta'a seti nu rure ixixxi nu raka xxatta yaxi. Setiha ankana taga'a ge ttu yaga tee láni nardo. Nuilaha nna ulha'ana re'e toha nna bedo ttattana seti ta'a lhe'e nuha iki Jesús-ni. ⁴Ttu chupa ka nu se'e niha, nna bisa'akinna nna ra luesikani:

—¿Beaka kwentaba bedelha lattibana seti-na? ⁵A bito'ochila nuná gwate tsunna gayua (300) denario. Belhuha nna dhi ka benne dii ata abittu tee geke.

Nianna rinnekana ge nuilaha.

⁶Jesús-ni nna ree kana:

—Naa la rena. Bittu innele geni, kumu ttu nu tse nuní chi benna len neti. ⁷Ka benne dii abittu geke tee satíaba tse'e ka benne-na len lebi'i nna gwakaba gele ute nále len ka benne-na tti aka lele, ttaka neti labí satía dhoa len lebi'i. ⁸Nuila-ni benba nuní nu ukaba geni; chi begu'u gaana seti rure ixixxi-ni latia kini igatsia ganna chi uttiaha. ⁹Netiru ria, itúba yiesi lo yu-ni gaxaba lhe'e ka yiesi ata kixxi'a ka benne ka tisa kia-ni, kixxi'agabake ge nuila-ni. Aníha kini sadú le ka benne ge nu benna-ni.

Judas-ni betena Jesús-ni lasi ná ka nu uttikane

(Mt. 26:14-16; Lc. 22:3-6)

¹⁰Judas Iscariote, ttu ka benne tsi'inu rudhetini Jesús-ni (12), ugíana gwanne lenna ka nu loni ge ka bixxudiha kini utena Jesús-ni lasi nákani. ¹¹Lakana nna bedeakabakinna ge nu rana kanaha, nianna bisia ro'okani ugwekana na belhiu. Lana nna udulo ttebana begila leni ki gaxasina utena Jesús-ni lasi nákani.

Jesús-ni roe len ka benne rudhetinieha irse ge laní Pascua

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹²Sá neru ge laní Pascua tti ro ka benne Israel-ni yettaxtila nu abittu kua dii dia ikiniha lhe la'aniagaba nuha ruttike ka neru re'eni to roke laníha, nianna tti unnaba tisa ka benne rudhetini Jesús-ni, ráke bie:

—¿Gá raka lelu tsiatu sentu irse ki gori'i laní Pascua-ni?

¹³Lee nna udhelhe chupa ka benne rudhetinieha nna ree ke:

—Gwaltsia lhe'e yiesi-na. Naa eti'ale ttu nubiyú dedána denojana ttu re'e inda nna gwaltsia gwasanalha na. ¹⁴Ata eta'anaha, niha gwaligasi xxana yo'oha: “Aní ra maestruha: ¿Gon-na do ttu cuarto ata go irse lania ka benne rudhetinia-ni irse ge laní Pascua?” ¹⁵Xxana yo'oha nna ule'enna le yo'o nu do berupa kuaha. Niha chi do tse ttu cuarto xeni. Lhe'e nuha gwaluin irse ki gori'i.

¹⁶Ka benne rudhetinieha nna dia ttebake uta'ake lhe'esiha nna gwaxxakabake iyába atti tteba chi ree keha. Niha benke irse ge laní Pascua.

¹⁷Tti chi ralhaha nna bisin Jesús-ni len ka benne tsi'inu rudhetinieha (12). ¹⁸Tti chi se'eke ro'o mexaha go irse, nianna tti ree:

—Netiru ria, delo iyále se'ele go len neti ro'o mexa-ni nuxa ttúle nuní utele neti lasi ná ka nu uttikana neti.

¹⁹Lake nna bedú si'i ttebana leke nna ttu ttubake unnaba tisake Jesús-ni, ráke:

—¿Si bittuba neti nuná xa tata?

²⁰Lee nna bekabie, ree ke:

—Delo iyá tsi'inule (12) se'ele nii, ttúle nu rugutule lhe'e ttúba ye'ena-ni len neti, lana nuha utena neti lasi ná ka nu uttikana netiha. ²¹Neti benne daya yebáha eya'abaa attiba chi ga'anna lo ka yetsi ge Tata Do Yebáha. Ttaka gwalíchiru le nu utena neti lasi ná ka nu uttikana neti. Tserula saríana na ganna abittu ulina, a laa kila ulina.

²²Laka se'eke goha nna bedaxxu Jesús-ni yettaxtilaha nna begwebie Tata Do Yebáha ixkixaru. Nianna tti ulha'abie lhe'e benneha nna begwebie ka benne rudhetinieha nna ree ke:

—Gwaligo yettaxtila-ni. Benne-ni anke bela latia.

²³Iki de nuha nna tti bedaxxue xiga ta'a vinuha nna begwebie ixkixaru Tata Do Yebáha, nianna tti begwebie ka benneha nna iyábake u'uyake vinuha. ²⁴Nianna tti ree ke:

—Nuní ankana reni kia rugwena lidhaka tisa chi bodha'an Tata Do Yebáha len ka benne. Reni-ni ilalina kini odilána ixe ka benne. ²⁵Netiru ria, debá nnannaba ri'iya vinu-ni, labíru i'iyaa na, gannaliba chi besinaa ata rinnabia Tata Do Yebáha, la'anialiba nna ede'eyaa vinu kubi attu libe.

²⁶Iki de chi bilhake ttu le'a to, nianna tti biriake diake iki i'iya ata daa ka ya olivuha.

**Jesús-ni rigixxi'abie deki Pedro-ni labí dhi ro'oni
deki ankabienne**

(Mt. 26:31-35; Lc. 22:31-34; Jn. 13:36-38)

²⁷Tti chi se'eke iki i'iyaha, nianna ra Jesús-ni ka benne rudhetinieha:

—Nnolha iyábale isatsale udhá ikile neti. Akaba attiba chi unne Tata Do Yebáha lo ka yetsi geeha, tti ree: “Neti uttibaa nu reki lo ka neruha nna ka neruha nna isatsa ttebakana.”^x

²⁸Rágaba Jesús-ni:

—Ttaka iki de chi beyaka bania lo elhuttiha, la'ania nna eya'a gaaya enerua lole esinaa daka Galilea-ni, delola nna esiale.

²⁹Pedro-ni nna rane:

—Meskiba adí ka nuní udhá ikikani lu, neti labí udhá ikia lu.

³⁰Jesús-ni nna rabie na:

—Netiru ria, nnolha tti lanila kwesi chinkaha chupa libe, lu tsunna libela chi bedhea lelu abittu ridí ro'olu deki ankabienlu neti.

³¹Ttaka Pedro-ni nna ttu dúbana rana:

—Meskiba gattia lenlu, labí innía deki labí ankabiati lu. Aníha-gaba ra adí ka benneha.

Jesús-ni rilhapie tisa len Tata Do Yebáha Getsemaní-ni

(Mt. 26:36-46; Lc. 22:39-46)

³²Nianna dia Jesús-ni len ka benne rudhetinieha ttu latti ata tee láni Getsemaní, nianna ree ka benneha:

—Nii gwaltse'e, laka neti tanne lania Tata Do Yebáha.

³³Chebe Pedro-ni lhe Jacobo-ni lhe Juan-ni lhe, nianna tti uduloe bedú si'ina lebie lhe bedú xxattane lhe. ³⁴Nianna tti ree kana:

—Yalhá si'i du lasia. Gwanalu chiba gattia rakati. Nii gwaltse'e nna bittu ga'adhile.

³⁵Lee nna biru'une attu latti daka aná nna bedú xibie bere loe lo yu, nianna tti unnabe len Tata Do Yebáha kini gaa godilábe bie lo nu sateeha. ³⁶Nianna ree:

^x 14:27 Zacarías 13:7

—Tata to kia, nu diru innálu, benchi kini abittu uyúá elha disa-ni, kumu lu gwakaba gelu uinlu iyá. Ttaka labí nu innía aka, sinuki nu innába kwinalu aka.

³⁷Tti beyekie ata se'e ka benne tsunnaha nna gwaxxake ke te'adhilake. Nianna tti ree Pedro-ni:

—Simón Pedro, ¿si te'adhibalu? ¿Si bi gwa udaalu dho tennálu kwadiba ttu ura? ³⁸Gwaltse'e tenná lhe gwalinnaba len Tata Do Yebáha kini abittu dhi yie nu xxegwiha le nna eyadi gaale. Gwalí galá, lebi'i gwa rakabinle tse'e tennále, ttaka bela latile-na labí ridaana uchiana.

³⁹Nianna tti bedeyekie attu libe nna gwadinne lenbie Tata Do Yebáha, bodeki adakabe ka tisa nu chi ree benneha. ⁴⁰Tti bedeyekie besine ata se'e ka benneha attu libe nna gwadixxakagabe ke dedete'adhigabake kumu de ta'a xxatta loke bisuela nna abígaba yuke bixa ekabike gebie. ⁴¹Tti beyekie besine ata se'e ka benneha nu beyonna libeha, nianna tti redeabie ke:

—¿Si sa tebale te'adhile? ¡Ttanába! Chinka gwaleyadha, kumu neti benne daya yebáha chiba bisia ura nuní utekana neti lasi ná ka nu runi tulha. ⁴²¡Chinka gwaleyadha nna gwaleyaa! ¡Ne nu utena neti lasi ná ka nu uttikana netiha, chi daa naa!

Bedaxxukana Jesús-ni kini uttikane

(Mt. 26:47-56; Lc. 22:47-53; Jn. 18:2-11)

⁴³Sa dula Jesús-ni gwenne, ttiru chi bisin Judas nu selana lhe'e ka benne tsi'inu (12) rudhetinieha, dia lenna ixé ka nu denkana yaga lhe espada lhe. Ka nuha udhelha ka nu loni ge ka bixxudiha lhe ka nu rule'ekinna ka benne nu ra lo bia bennabi bodha'an Moisés-ni lhe, anágaba diagaba ka benneola ge ka nu Israel-ni. ⁴⁴Judas nu utena Jesús-ni lasi ná ka nu udaxxukaneha nna chi rana ka nuha:

—Nu ibigaa goa xxaganiha, lana nuha. Gwaludaxxu na nna gwaluxxika na kini abittu elána.

⁴⁵Aníoka nna tti bisin Judas-ni ata du Jesús-ni nna tti ubigana nna rane:

—Maestru.

Nianna tti utona xxage. ⁴⁶Ka nuha nna bedaxxu ttebakane nna dechekane. ⁴⁷Ttaka ttu ka benne du len Jesús-ni nna

ulea ttebe espada geeha nna uchúe naga nu riben lo sina ge bixxudi xeniha. ⁴⁸Nianna ra Jesús-ni kana:

—¿Beaka ttiba nu daa gwedaxxu ubana dale gwedaxxu neti denle espada lhe yaga lhe? ⁴⁹Ki ttu ttu sába dua len lebi'i rule'enia le ka tisa ro'o yotu-na nna abí chiga bedaxxule neti. Ttaka teeki aka aní kini saxxína nu ra lo ka yetsi ge Tata Do Yebáha.

⁵⁰Looraha nna iyába ka benne rudhetinieha ttúbe bedúke nna bexunnilake. ⁵¹Sunruba ttu nu kwiti diana danalhana Jesús-ni, nukuna ttu lari nna lariha-ba biyaxxukinna.

⁵²Ttaka lana nna belhá bixxina lari nukunaha nna tuntubana bexunnina.

Jesús-ni biso due arlo ka uxtisi ge ka nu Israel-ni
(Mt. 26:57-68; Lc. 22:54-55, 63-71; Jn. 18:12-14, 19-24)

⁵³Nianna bisin lenkana Jesús-ni arlo bixxudi xeniha nna betupa tteba iyába ka nu loni ge ka bixxudiha lhe ka benneola ge ka nu Israel-ni lhe anágaba ka nu rule'ekinna ka benne nu ra lo bia bennabi bodha'an Moisés-ni lhe. ⁵⁴Pedro-ni nna idittuliba danalhana Jesús-ni bisinna lali'a yo'o ata do bixxudi xeniha, nna niha-ba urena len ka nu rise'e gweyú ro'o lisi bixxudi xeniha rutsa'ana ro'o tee.

⁵⁵Ka nu loni ge ka bixxudiha lhe iyába ka nu runi elhuxtisi ge ka nu Israel-ni, yu'ukana regila lekani bixa usiakana iki Jesús-ni kini anáchu tee ro'okani uttikane, ttaka labí raxxakakana ttu bixa. ⁵⁶Kumu ixé ka nu ruin lekani rusiakana ikie, rákana deki runie ttu bixa, ttaka labí turo'o raxxína nu rinnekanaha. ⁵⁷Ttu chupakana udú liikana nna rusiakana ikie nu labí lii nna rákana:

⁵⁸—Ri'itu biyienintu rana: “Neti uttampaa yotu-ni, yotu nu ben ka benne se'e yiesi lo yu-ni. Nianna delo tsunna ubisaba nna chi elhidhaa attu yotu nu labí uin ka benne se'e yiesi lo yu-ni.”

⁵⁹Ttaka nigaba aníha nna labí raxxína turo'o len nu rinnekanaha.

⁶⁰Nianna tti udú lii bixxudi xeniha lagwi ge ka benne tupa niha nna rana Jesús-ni:

—¿Bíunni rusia ka nuní ikilu? ¿Si lagwa gwekabilu ge nu rákana-ni?

⁶¹Ttaka Jesús-ni siiba uke, labí bekabie geni. Nianna tti bedennaba tisa bixxudi xeniha bie attu libe, rane:

—¿Si lu ankalu Cristu Xi'in benne anke le'aha?

⁶²Lee nna bekabie geni, ree:

—Ila, neti galá. Lebi'i gwalábinle neti benne daya yebáha dhoa daka ná bani ge benne ra tsitsi xxatta leeha lhe ilágabinle neti dedáya yebáha lhe'e bea.

⁶³Tti biyienin bixxudi xeniha nu ra Jesús-ni nna ucheda bixxiba xoni kini ula'a deki rise'enna, nianna tti rana:

—Nuruala riyasinri'i nuxa kixxi'ana bixa ben nuní. ⁶⁴Ki kwinnaba lebi'i chi biyienin nagale rorexxa gaalana Tata Do Yebáha. Lebi'i nna, ¿bí rakinle?

Nianna iyábakana beda'a ro'okani rákana deki ralhaba Jesús-ni gattie.

⁶⁵Attu chupakana nna udulokana bettuttu xxenkani lo Jesús-ni lhe bettokana loe lhe rudhenkane lhe. Nianna tti rákane:

—Unne ya'achu, ¿núnni rudhenna lu?

Lhe anágaba ka nu rise'e gweyú ro'o yotuha ribeagabakana gi ro'e.

Pedro-ni labí ridí ro'oni deki ankabienna Jesús-ni

(Mt. 26:69-75; Lc. 22:55-62; Jn. 18:15-18, 25-27)

⁶⁶Pedro-ni nna duna rre lali'a yo'o ge bixxudi xeniha, nianna tti ute ttu ka nuila riben sina lhe'e yo'oha, ⁶⁷nna tti bilen nuha Pedro-ni dona kwe'e giha rutsa'ana, nianna belanni tseaxabana loni nna tti rana na:

—Iyágabalu danalhalu Jesús ge Nazaret-ni.

⁶⁸Pedro-ni nna labí uxí ro'oni nna rálana nuilaha:

—Deloxa, labí yua bí ge nuná rinnelu.

Nianna tti deyya Pedro-ni eriana ro'o yo'oha [nna uresi tteba chinkaha].

⁶⁹Tti bedeláni nuilaha na attu libe, nianna redeana ka nu se'e niha:

—Nubiyú du nii, ttu ka nu danalhakana Jesús-niba nuní.

⁷⁰Ttaka lana nna attu libe, labí bededí ro'oni. Nianna attu sattiruba nna ka nu se'e niha nna redeakana Pedro-ni:

—Gwalíba lu ankalu ttu ka nu selalu nuná, kumu lu ankalu ge Galilea.

⁷¹Lana nna rana:

—Gwalígatixa, labí ankabiati nubiyú rale-na. Tata Do Yebáha ugwebie neti elha disa ganna abíba liiti.

⁷²Looraha nna bedebesi chinkaha attu libe. Nianna tti gwadú le Pedro-ni nu ra Jesús-ni na tti ree na: “Lanila kwesi chinkaha chupa libe, lu beyonna libela chi bedhea lelu abittu ridí ro'olu deki ankabienlu neti.” Nianna tti uresi tteba Pedro-ni.

Jesús-ni biso due arlo Pilato-ni

(Mt. 27:1-2, 11-14; Lc. 23:1-5; Jn. 18:28-38)

15 ¹Dila tteba bitupa ka nu loni ge ka bixxudiha lhe ka benneola ge ka nu Israel-ni lhe, anágaba ka nu rule'ekinna ka benne nu ra lo bia bennabi bodha'an Moisés-ni lhe adíru ka nu ruinkana elhuxtisi gekaniha lhe, nianna beda'a ro'okani nna bexxigakana Jesús-ni nna chekane gwaga'akane lo Pilato-ni. ²Pilato-ni nna unnaba tisane, rane:

—¿Si lu nuní ankalu nu rinnabia ge ka benne Israel-ni?

Labie nna bekabie geni, ree na:

—Luba chi ra deki nuná ankaa xa.

³Kumu ka nu loni ge ka bixxudiha ixeba nu rusiakana ikie, ⁴de nuha nna bedennaba tisa Pilato-nie attu libe, rane:

—¿Si lagwa gwekabilu? Biyúruga ixeba nu rusia ka nuní ikilu.

⁵Ttaka Jesús-ni nna labí bekabie geni. De nuha nna Pilato-ni rugía ya'abana de labí rekabie.

Beda'a ro'okani uttikana Jesús-ni

(Mt. 27:15-31; Lc. 23:13-25; Jn. 18:38–19:16)

⁶Kua risiaba laní Pascua rodilaa Pilato-ni ttu ka nu tee lisiyya. Nu rakaba le ka benne olhána. ⁷La'aniagaba tee ttu nubiyú lisiyya lána Barrabás. Tena lisiyya len adí ka luesini. Lakana bese'e disakana lo ka uxtisi nna benkana elhutti.

⁸Nianna ixeru ka benne bisinke ata do Pilato-ni nna unnabake lenna kini odilána ttu nu tee lhe'e lisiyya attiba labinna ruinna ttu ttu ida. ⁹Nianna tti bekabi Pilato-ni gekani, rana kana:

—Lebi'i benne Israel, ¿si gwa raka lele odiláya nu rinnabia gele-ni?

¹⁰Aníha ra Pilato-ni kumu rite dábinna deki ka nu loni ge ka bixxudiha, de ritisibakinna Jesús-ni nna gwaga'akane loni. ¹¹⁻¹²Nianna tti redea Pilato-ni kana attu libe:

—Nianna, ¿bí raka lele udhaka nu tenle láni nu rinnabia gele?

¹³Lakana nna ribesi'akana idisa, rákana:

—¡Betá nuná lo ya kurusi!

¹⁴Ttaka Pilato-ni nna rana kana:

—¿Beaka? ¿Bí nu satsa ben nuní?

Ttaka lakana nna adíla idisa ribesi'akana, rákana:

—¡Betá nuná lo ya kurusi!

¹⁵Ttaka Pilato-ni, de ruinna kini eya'an tsena len ka benne, aníoka nna bolhána Barrabás-ni beria nuha lisiyya. Nianna tti udhelha Pilato-ni bekuhakana Jesús-ni. Iki de nuha nna botene lasi nákaní kini utákane lo ya kurusi.

¹⁶Nianna che ka soldaduha bie lali'a guskadu ata do nu rinnabia ge Roma-ni. Niha bottupakana iyá xea ka soldaduha ¹⁷nna tti begukukane ttu lari xiná chulha. Nianna benkana ttu corona yetsi nna ulu'ukana ikie ¹⁸nna udulo ttebakana delo tisaba rinnekana idisa, rákane:

—¡Xxeni ra lelu xa nu rinnabia ge ka nu Israel!

¹⁹Nianna tti riginkana ikie len ttu vara ge nu rinnabia lhe ruttuttu xxenkani loe nna tti riyettakana rudú xibikani arloe. ²⁰Iki de chi bedhaka xiikaneha, nianna tti bebeakana latie lari xináha nna bogukukane ka xoeha, nianna tti uleakane ki utákane lo ya kurusiha.

Jesús-ni betákane lo ya kurusiha

(Mt. 27:32-44; Lc. 23:26-43; Jn. 19:17-27)

²¹Ka soldaduha nujakinna Jesús-ni ya kurusiha. Lo neda dia lenkaneha, niha beti'akana Simón ge lhe'esi Cirene, xxudi ka Alejandro-ni lhe Rufo-ni lhe. Benneha dedábie ugíe lhe'exxi. Nianna bedo doelha ka soldaduha bie kini uje kurusi ge Jesús-ni. ²²Nianna tti dia lenkana Jesús-ni nna bisin lenkane ttu latti ata tee láni Gólgota. (“Gólgota” dienna innána: Bega Iki Nu Yatti.) ²³Niha begwekane vinu chixxina nu xixxi tee láni mirra, ttaka lee nna labí uka lebie i'iyé vinuha. ²⁴Nianna tti betákane lo ya kurusiha. Ka soldaduha nna bedelhakana suerti kini elha'akana ka xo Jesús-ni kini ula'ana nú ka xoeha eche ttu ttukana.



(San Marcos 15:24)

25Retin jaa dila nuha betákane lo ya kurusiha. **26**Nianna tti betákana ttu breta xekie ata rigixxi'a bí lo ni'a ge betákane lo ya kurusiha. Lo bretaha dia ra: “Nuní ankana nu rinnabia ge ka benne Israel.” **27**Betágabakana a chupa ka nubiyú lo ka ya kurusi. Ka nuha benkana ubana. Ttúna betákana daka ná banie nna attuna nna betákana daka ná yattie. **28**[Aníha ki gwado tisa ge nu ra lo ka yetsi ge Tata Do Yebáha, ata dia ra: “Betselabakane len ka nu ruin tulhaha.”^y]

29Ka nu rite ata taabieha nna ruttába ikikani rulisa xxattakane, rákana:

—¡Kaxa! ¡Lu ralu deki ottampalu yotu-na nna delo tsunna ubisaba chi elhidhalu na! **30**¡Ganna gwalíginlu nna titúbalu benchu ki lhaalu lo ya kurusi-na nna beyadichu!

31Aníha-gaba ruin ka nu loni ge ka bixxudiha lhe ka nu rule'ekinna ka benne nu ra lo bia bennabi bodha'an Moisés-ni, rulisa xiikane nna ra luesikani:

—Ki ka benne subi gwa bodilána, ttaka lana nna a raka geni lhaa titúbana lo ya kurusi-na. **32**¡Ki rana deki ankana Cristu nu rinnabia ge ka benne Israel-ni, gwelha eyadichuna ki ilenri'i, kini anáchu nna ri'i tsia leri'i!

Anágaba axtagaba ka nu taa len Jesús-ni lo ka ya kurusiha rulisagabakane.

Jesús-ni uxíbie elhutti lo ya kurusiha
(Mt. 27:45-56; Lc. 23:44-49; Jn. 19:28-30)

³³Tti chi begwena retin tsi'inuha (12) itúba yiesi lo yu-ni bechulha nna axtaliba retin tsunnaha beyani. ³⁴La uraha-gaba nna uresi'a Jesús-ni itú lebie, ree:

—Eloi, Eloi, ¿lama sabactani? —Tisa-ni dienna innána: Tata Do Yebaa kia, Tata Do Yebaa kia, ¿beaka rudhá ikilu neti?^z

³⁵Adí ka nu se'e niha, tti biyienkinna nu unneeha, nianna ra luesikani:

—Gwaludoruga nagale, chi raxina profeta Elías-ni.

³⁶Nianna tti biresu tteba ttu nubiyú du niha gwaxxína ttu xunu nna bodibidhana nuha len vinu idí, nna tti bexxikana nuha lo ttu iyyaxtila nna bedona nuha ro'o Jesús-ni ki i'ye. Nianna rana:

—Naa la taana. Ulannichuri'i si gwita Elías-ni echidana na lo ya kurusi-na.

³⁷Jesús-ni nna uresi'e idisa, nianna utti ttebe. ³⁸Looraha nna bireda lari daa lhe'e yotuha, chubaa tí uka nuha biredana. Udulo xekini nna axtaba xani'ani bireda. ³⁹Soldadu nu baninna ttu gayua (100) ka soldadu ge Roma-ni, nuha duna gaxxaba arlo Jesús-ni nna tti biyieninna uresi'e lhe tti bilenna gasina uttie, nianna tti unnea, rana:



(San Marcos 15:38)

^z 15:34 Salmo 22:1

—Nubiyú-ni gwalíba anka nuní Xi'in Tata Do Yebáha.

⁴⁰Se'egaba ttu chupa ka benne nuila, idittuliba se'eke rulannike. Lhe'e ka benneha sela María Magdalena lhe Salomé lhe. Niha-gaba du María nan ge José-ni lhe Jacobo nu gwexxaha lhe. ⁴¹Ka benne nuila-ni nuha gwanalhake Jesús-ni lhe bete náke lenbie tti rekie daka Galilea-ni. Ata se'eke gwelanniha, niha-gaba se'eru ixé ka nuila ka benne ugía lenke bie Jerusalén-ni.

Jesús-ni bekatsike bie

(Mt. 27:57-61; Lc. 23:50-56; Jn. 19:38-42)

⁴²Tti chi ulha sá viarna, la sáha nuha chi rese'e tse ka benne Israel-ni ki udaxxuke sá reyaka lekeha, ⁴³la'ania nna ugía José benne lhe'esi Arimatea, benneha labí usinie gwatte'e lo Pilato-ni kini rennabe echide Jesús-ni lo ya kurusiha. José-ni anke ttu ka nu resá lagwi ge ka nu runi elhuxtisi ge ka benne Israel-ni lhe anágaba dogabe ribede isia sá innabia Tata Do Yebáha. ⁴⁴Pilato-ni uka ttebinna tti binana deki chiba utti Jesús-ni. Nianna uxi ttebana soldadu nu baninna adí ka soldaduha ki unnaba tisana nuha ganna si gwalí chi uttie. ⁴⁵Tti utixxi'en soldaduha na deki gwalíba chi utti Jesús-ni, nianna bote ttebane len José-ni.

⁴⁶José-ni nna uyo'ona ttu lari sibi nna tti bechidana Jesús-ni nna bottesine lhe'e lariha, nianna gwakatsine lhe'e ttu baa uche'enna lhe'e ttu íyya daa niha. Nianna tti bottulhuna ttu íyya nna gwadheana ro'o yieru baaha. ⁴⁷María Magdalena-ni lhe María nan ge José-ni lhe, lake bilákanie ata bigatsi Jesús-ni.

Jesús-ni beyaka benbie lo elhuttiha

(Mt. 28:1-10; Lc. 24:1-12; Jn. 20:1-10)

16 ¹Tti chi ute sá tti reyaka le ka benne Israel-ni, María Magdalena-ni lhe Salomé-ni lhe María nan ge Jacobo-ni lhe uyo'oke ixé loo ka nu rure ixixxi kini sattabike lati Jesús-ni. ²La dila bedulo xumanuha nna dila tteba si dáruba riria tatubisa-na, dia ka benne nuilaha ata bigatsi Jesús-ni. ³Laka yu'uke nedaha nna ra luesike:

—¿Núru nuha kuana íyya yaya ro'o yieru baaha ganna?

⁴Aníha ráke kumu yalhá xeni anka íyyaha. Ttaka atti

belannike ro'o yieru baaha nna bilákanie chiba bisila íyyaha. ⁵Tti uta'ake lhe'e yieru baaha nna bilákanie do ttu nubiyú kwiti nukuna ttu xo ttuni. Sitsi túba anka xoniha nna dona daka ná bani ge yieru baaha. Ka benne nuilaha nna yalhá usikanie.



(San Marcos 16:5)

⁶Nubiyúha nna rana ke:

—¡Bittu gasinle! Lebi'i regilale Jesús ge Nazaret benne betákana lo ya kurusiha. Benneha chiba beyaka benbie. Lanúrue tee nii. Gwalulanniruga ata utixxakaneha. ⁷Gwaleyya nna gwaligasi ka benne rudhetinieha lhe gwaligasi Pedro-ni lhe, daka Galilea-nila chi deyye daneru gaabie nna niha-liba ilenlee, attiba chi rabie le tti sa reki lenleha.

⁸Ka benne nuilaha nna boxunni ttebake beriake ro'o yieru baaha kumu rasibakanie lhe rixidibake lhe. Lanú nu utixxi'akanie kumu de si rasilakanie.

Jesús-ni bele'e loe len María Magdalena-ni

(Jn. 20:11-18)

⁹[La sá tti bedú ni'a xumanuha, beyaka ben Jesús-ni. Tti chi daa tsaniha, lade'a tte bele'e loe len María Magdalena-ni, benne bebebie gasi ka espíritu xxegwiha latie. ¹⁰Benne nuilaha nna ugíe gwattixxi'anie ka benne gwanalhake Jesús-ni tti do benbieha. Ka benneha se'eke du si'i leke lhe ribesike lhe. ¹¹Tti biyienkanie deki anka benba Jesús-ni lhe deki chi bilen María-nie lhe, lake nna laa ugía leke ge benneha.

Jesús-ni bodola'a loe len chupa ka benne bedhetinieha

(Lc. 24:13-35)

¹²Delola nna attu ya lela bodola'a lo Jesús-ni len a chupa ka benne gwanalhake bieha. Ka benneha yu'uke neda diake lhe'exxi. ¹³Ka benneha nna beyekike gwattixxi'akanie adí ka benneha, ttaka nigaba ge ka benne chupaha a ugía leke.

Jesús-ni ridhelhe ka benne rudhetinieha

kini tsiake kixxi'ake ka tisa geeha

(Mt. 28:16-20; Lc. 24:36-49; Jn. 20:19-23)

¹⁴Iki deliba nuha nna tti bele'e lo Jesús-ni len ka benne sineaha tti yu'uke go yettaha. Utise ke kumu de ttu tsaba labí ridielhake tsia leke ge ka benne chi bilákanie bie deki beyaka banie. ¹⁵Nianna tti ra Jesús-ni ke:

—Gwaltsia itú tte yiesi lo yu-ni nna gwalikixxi'ani iyá ka benne ka tisa ge Tata Do Yebáha. ¹⁶Ka benne tsia leke neti nna gadike inda, ka benneha godilába Tata Do Yebáha ke. Ttaka ka nu abittu tsia lekani neti, urixxi ukinnibe kana. ¹⁷Ka nuní ka milagru uni ka nu tsia lekani neti: neti udettikana tti ebeakana ka espíritu xwegwi yu'u lati ka benne, lhe anágaba innegabakana attu tisa subi, ¹⁸lhe meskiba udaxxukana ttu belha nna labí kisi'a nuha kana, lhe anágaba ganna i'iyakana bixa ttu nu dia venenu ikini labí bi dhakakana lhe ttixka ixxua nákanie iki ka benne rani nna gweyakaba ka benneha.

Jesús-ni beyapie deyye yebáha

(Lc. 24:50-53)

¹⁹Iki de unne Jesús benne anke Xxanari'iha len ka benne sinea bedhetinieha, nianna tti beyapie deyye yebáha nna besine udoe daka ná ben ge Tata Do Yebáha. ²⁰Ka benne bedhetinieha nna biriabake rigixxi'ake ge Jesús-ni iyá laduba nna labe due rute nábie lenke, lhe anágaba len ka milagru ruinkeha rula'a deki nu rigixxi'akeha, nu gwalíba anka nuha. Amén]